

四庫全書

子部

欽定四庫全書

子部

玉海卷七十一

詳校官給事中臣查善長

主事臣祁韻士覆勘

總校官進士臣朱 鈐

校對官編修臣沈清藻

謄錄監生臣姜也魯

欽定四庫全書

玉海卷七十

禮儀

朝儀

太微中居列宿環拱聖王正表著之位辨廉陞之等
法乎天也

堯外朝

宋 王應麟 撰

列子仲尼篇堯治天下五十年不知天下治歟不治歟
問外朝外朝不知

舜朝會方岳

舜典輯五瑞既月乃日覲四岳羣牧班瑞于羣后歲二
月東巡狩肆覲東后五載一巡狩羣后四朝注各會朝
于方岳之下疏凡四處別朝 王制注虞夏之制諸侯
歲朝疏案尚書鄭注云巡守之年諸侯朝於方岳之下
其間四年四方諸侯分來朝於京師歲徧鄭志夏殷六

年一巡守諸侯歲朝唯指唐虞異義云公羊說諸侯比
年一小聘三年一大聘五年一朝天子左氏說十二年
之間八聘四朝再會一盟許慎案公羊說虞夏制左氏
說周制鄭駁之云三年聘五年朝文襄之霸制文十五
年左傳云諸侯五年再相朝以修王命古之制也此為
夏殷之禮 通典唐虞夏氏之時四方諸侯歲一朝殷
制五年一朝 左傳哀七年子服景伯曰禹合諸侯於
塗山執玉帛者萬國

注在壽
春東北

周穆有塗山之會

注會諸
侯 唐

志塗山在濠州鍾離柳宗元有銘 越傳曰禹到
越望苗山會諸侯爵有德封有功更名會稽山

周三朝 四朝 朝儀 朝位 治朝 外朝

燕朝 內朝 羣臣班 射朝

天官大宰王眡治朝則贊聽治注治朝在路門外羣臣
治事之朝王視則助王平斷疏王有三朝外朝是斷
疑獄之朝路寢庭朝圖宗人嘉事二者事簡非正朝
故知治朝是路門外司士所掌者也 內宰疏王立
朝者即三朝

宰夫掌治朝之法以正王及三公六卿大夫羣吏

之位掌其禁令注治朝在路門之外其位司士掌馬宰
夫察其不如儀疏治朝在路門外者燕朝在路寢庭外
朝在庫門外其事希簡治朝是常治事之朝地官師
氏居虎門之左司王朝注路寢門也王日視朝於路寢
門外疏其路寢庭朝及庫門外之朝非常朝之處司
士所掌路門外是常朝日所朝之所槁人掌共外
內朝冗食者之食注外朝司寇斷獄禁訟之朝也今司
徒府中有百官朝會之殿云天子與丞相舊決大事焉

是外朝之存者與內朝路門外之朝也疏天子三朝路
寢庭朝是圖宗人嘉事之朝太僕掌之又有路門外朝
是常朝之處司士掌之又外朝在臯門內庫門外三
槐九棘之朝是斷獄弊訟之朝朝士掌之今言外內朝
明據三槐與路門外二者以其路寢庭非常朝之處也
今司徒府已下引漢法說之 春官司服眡朝則皮弁
服注視內外朝之事王受諸侯朝覲於廟則衮冕 巾
車象路注以日視朝疏謂於路門外常朝之處乘之至

於三朝皆乘之

夏官司士掌羣臣之版

故書版為班

以治

其政令正朝儀之位辨其貴賤之等王南鄉三公北面
東上孤東面北上卿大夫西面北上王族故士虎士在
路門之右南面東上大僕大右大僕從者在路門之左
南面西上注此王日視朝事於路門外之位疏對彼大
僕職路寢庭有燕朝朝士職庫門外有外朝而言也但
彼外朝斷獄訟并三詢之朝有諸侯在焉諸侯既在
西方右九棘之下孤避之在東方羣臣之位西面也其

餘王公卿大夫等仍與此位同

魏志王肅曰周官則備矣五日一朝公卿大夫

並進而司士辨其位漢初依擬前代公卿皆親以事升朝

司士擯孤卿特揖大夫以

其等旅揖士旁三揖王還揖門左揖門右大僕前注前

正王視朝之位王入內朝皆退注王入入路門也王入

路門內朝朝者皆退反其官府治處也王之外朝則朝

士掌焉玉藻曰朝服以日視朝於內朝云云謂諸侯疏

欲見天子諸侯皆有三朝之意玉藻諸侯禮云朝于內

朝者謂路門外朝為內朝對皋門內應門外朝為外朝

通路寢庭朝為三朝 大僕王眡朝則前正位而退入
亦如之注王既立退居路門左待朝畢建路鼓于大寢
之門外注大寢路寢也其門外則內朝之中如今宮殿
端門下矣疏文王世子以路門外為外朝者對路寢庭
朝為外朝其實彼外朝亦內朝耳既以三槐九棘朝為
外朝此二者皆內朝也王眡燕朝則正位掌擯相注燕
朝朝於路寢之庭王圖宗人之嘉事則燕朝疏以其路
寢安燕之處謂之燕朝與賓客饗食在廟燕在寢也但

與賓客及臣下燕時亦有朝因燕而朝賓臣燕禮已有

成文圖宗人嘉事者朝不見故鄭特見之

宗人冠昏嘉禮之等皆曰

嘉事 秋官大司寇注嘉石文石也植之外朝門左小

司寇掌外朝之政以致萬民而詢焉一曰詢國危二詢

國遷三詢立君注外朝朝在雉門之外者也其位王南

鄉三公及州長百姓北面羣臣西面羣吏東面小司寇擯

以叙進而問焉以衆輔志而弊謀疏小司寇與朝士同掌

之外朝在雉門之外則亦在庫門之外也 朝士掌建

邦外朝之灋左九棘孤卿大夫位焉羣士在其後右九棘公侯伯子男位焉羣吏在其後面三槐三公位焉州長衆庶在其後左嘉石平罷民焉右肺石達窮民焉注鄭司農云王有五門外朝在路門外內朝在路門內玄謂外朝在庫門之外皋門之內與今司徒府有天子以下大會殿亦古之外朝哉周天子諸侯皆有三朝外朝一內朝二內朝之在路門內者或謂之燕朝疏天子外朝一者即朝士所掌者是也內朝二者司士所掌正朝

太僕所掌路寢朝是也諸侯內朝二者玉藻云朝于
內朝朝羣臣辨色始入君日出而視朝退適路寢使
人視大夫大夫退然後適小寢彼亦路門外內二者
為內朝閔二年云間于兩社兩社在大門內中門外
為外朝燕朝者大僕云掌燕朝之服位是也 大行
人上公之禮其朝位賓主之間九十步立當車軹擯
者五人諸侯之禮朝位賓主之間七十步立當前疾
擯者四人諸伯如諸侯之禮諸子朝位賓主之間五十

步立當車衡擯者三人諸男如諸子之禮注朝位謂大
門外賓下車及王車出迎所立處也王始立大門內交
擯三辭乃乘車而迎之齊僕為之節上公立當軹侯伯
立當疾子男立當衡王立當軫與凡大國之孤朝位當
車前不交擯凡諸侯之卿其禮各下其君二等注朝位
則上公七十步侯伯五十步子男三十步與疏聘禮在
大門外去門有立位陳介之所朝在路門外掌訝至于朝
詔其位疏外朝在大門外詩縣乃立皋門應門正義

諸侯三朝。臯門之內。雖有外朝。議大疑。詢衆庶。乃往不常在焉。其君日出所視。與羣臣決事之朝。在應門之內。

曲禮天子當依而立。諸侯北面而見天子曰覲。

疏是秋於廟受

覲禮也

天子當宁而立。諸公東面。諸侯西面。曰朝。疏此為

春夏受朝時也。爾雅門屏之間謂之宁。謂天子受朝於路門外之朝於門外而宁立以待諸侯之至。爾雅正門謂之應門。諸侯內屏在路門之內。天子外屏在路門之外。而近應門。注云朝者位於內朝而序進即路門外朝。

也對臯門內槐棘之外朝故稱內若對路寢庭朝又為
外故文王世子云朝於外朝則以官是也凡天子三
朝其一在路門內謂之燕朝大僕掌之云王祗燕朝
文王世子云公族朝於內朝親之也此王與宗人圖
其嘉事及王退俟大夫之朝也其二路門外之朝謂
之治朝司士掌之云正朝儀之位此是每日視朝之
位其王與諸侯賓射亦與治朝同故射人云三公北面
云云其三臯門之內庫門之外謂之外朝朝士掌之

此是詢衆庶之朝也燕禮云卿西面大夫北面士門
西東面大射亦然周禮天子有射朝燕禮諸侯有燕
朝則天子諸侯皆三朝也 文王世子庶子之正於

公族者云云其朝于公內朝則東面北上臣有貴者以

齒

注內朝
路寢庭

其在外朝則以官司士為之

外朝路寢門
之外庭司士

亦司馬之屬也掌羣
臣之班正朝儀之位

其在宗廟之中則如外朝之位

宗人授事以爵以官公族朝于內朝內親也外朝以
官體異姓也疏其朝位天子之朝三公北面東上孤

東面北上卿大夫西面北上其士門西東面北上若
諸侯之朝案大射卿西面北上大夫北面東上士門
西東面北上與天子不同 玉藻諸侯朝服以日視

朝於內朝朝辨色始入君日出而視之退適路寢聽
政使人視大夫大夫退然後適小寢釋服燕寢也注此

內朝路寢門外之正朝也天子諸侯皆三朝入羣臣

入應門

朱氏曰王日視朝於路
朝而退聽政於燕朝

疏天子三朝太僕燕

朝一也司士路門外二也朝士外朝三也諸侯三朝

文王世子內朝路寢朝一也世子又云外朝路寢門外二也諸侯三門是中門外大門內又有外朝是三朝也 月令疏天子有三朝一燕朝在路寢二治朝路寢門外應門之內三外朝在庫門之外臯門之內迎春而反賞公卿大夫於路寢門外正朝耕藉而反勞羣臣在於路寢爵賞公事與衆共之故在正朝燕勞私禮主於歡心故在路寢 三禮義宗曰每朝列位所向不同其三公之位常北面不變者以三公內臣位尊故

屈之其餘諸侯孤卿大夫皆以地道尊右故尊者東向

卑者西面於外朝諸侯東面於內朝孤卿東面時無諸侯故也

惟詢事之朝非常朝之限故不與三朝同一云容有諸侯之位故孤

卿在東若時會殿同方獄之下為宮壇見諸侯之法其位

皆如明堂之位天子宫方一千二百步三分二為路

寢之前一為路寢之後自臯門至路門凡五門相去之

數未聞路寢之前至臯門凡五門之間合八百步為三

朝皆方百步諸侯三門臯門至路寢相去六百步自路

寢以前為三朝各一百步又曰周禮天子諸侯皆有三朝一曰外朝二曰中朝三曰內朝其中朝之名或內或外若據外朝而言謂之內朝故鄭注文王世子諸侯外朝一內朝二是也三朝之最外為外朝者是決罪聽訟之朝也中朝者人君旦夕視政見卿大夫之朝也所謂辨色而入者在此朝也內朝者路寢也人君視政退而居於此待諸侯之復逆也視卿大夫退然後適燕寢所謂大夫夙退無使君勞在此朝也諸侯三朝路寢為內

朝中朝在路門之外外朝在應門之外天子臯門內有
外朝面有三槐左右各有九棘近庫門則有三府九寺
庫門之內則有宗廟雉門之內有兩觀觀外亦有詢事
之朝在宗廟社稷之間雉門外有百官宿衛省也應門
之內有中朝中朝東有九卿室是九卿治事之處故考
工記外有九室九卿治之朝畢則入而治事夕則歸於
庫門外外朝之法朝有疑獄王集而聽之 通典周制

天子有四朝

常言三朝者以詢
事之朝非常朝

一曰外朝在臯門內決

罪聽訟之朝也秋官朝士掌之二曰中朝在路門外夏
官司士正其位三曰內朝亦謂路寢之朝亦謂之燕朝
大僕掌之四曰詢事之朝在雉門外小司寇掌其政

左傳曹劌曰會以訓上下之則制財用之節朝以正班
爵之義帥長幼之序 魯國語天子及諸侯合民事於外

朝合神事於內朝

在路門內

自卿以下合官職於外朝

君之公朝

合家事於內朝

家朝

卿大夫亦二朝

禮夏官射人掌國

之三公孤卿大夫之位三公北面孤東面卿大夫西面

其執三公執璧孤執皮帛卿執羔大夫鴈注位將射始
入見君之位燕禮曰公升即位于席西鄉小臣納卿大
夫卿大夫皆入門右北面東上士立於西方東面北上
大射亦云則凡朝燕及射臣見君之禮同諸侯在朝則
皆北面詔相其瀟注諸侯來朝而未歸王與之射於朝
者皆北面從三公位疏引燕禮者欲見天子諸侯朝燕
射三者位同之義儀禮內諸侯有燕朝及射朝不見正
朝周禮內天子有射朝與正朝不見燕朝諸侯射朝與

燕朝位同則天子燕朝亦與射朝位同諸侯正朝亦與射朝位同是天子諸侯三朝各自同大射在學故有著寃在宸之事比賓射在路門之外朝與彼異 儀禮聘禮君與卿圖事注謀事者必因朝其位君南面卿西南夫夫北面士東面疏謀事必因朝者欲取詢衆之意諸侯三朝燕朝燕禮是也又射朝大射是也路朝外正朝不見疑當與二朝面位同故以燕禮大射儀約之知正朝面位然也若天子三朝射人見射朝司士見正朝不見燕

朝以諸侯正朝與燕朝同明天子燕朝亦與正朝同也

管人布幕于寢門外注寢門外朝也

疏謂路門外即王正朝之處諸侯三

門 卑應路路門外有常朝位

注引朝貢禮曰純四只制丈八尺疏引周禮趙商問

夕幣于寢門

外宰入告具于君君朝服出門左南鄉注寢門外朝也

入告入路門而告

疏此路門外正朝之處也

又賓拜饗餼于朝注

拜於大門外

疏大門外諸侯之外朝也之制見於經者天子有屏諸侯有朝

朱氏曰門外諸

侯路寢門外則有正朝大門外則有外朝其燕朝在寢燕禮是也

覲禮侯氏入門右

告聽事出自屏南適門西注天子外屏

釋宮曰屏謂之植注小墻當門

中 書康王之誥太保率西方諸侯入應門左畢公率東

方諸侯入應門右皆布乘黃朱賓稱奉圭兼幣

周之朝儀畧見

於此此朝會分班儀也

太保暨芮伯咸進相揖皆再拜稽首

此朝會合

班儀也

左傳叔向曰朝有著定會有著表會朝之言必聞

于表著之位注著定朝內列位常處謂之表著

野會設表以為

位周語大夫士日恪位著以敬其官注云中庭之左右曰位門屏之間曰著司常注事名號者徽識所以

題別眾臣植之於位朝各就焉

明堂位正義案覲禮諸侯受次于廟門

外是覲在廟三公中階之前此以下明朝位之法諸侯

在諸國之上特舉位言之 易氏曰燕朝在路門之內
治朝在路門之外又外而應門又外而雉門則有中門
之禁焉以至尊所居儀衛嚴肅幾其出入不可踰越惟
庫門在雉門之外而外朝又在庫門之外不特諸侯羣
臣之咸在雖州長衆庶與窮民罷民之類皆得至於左
右前後之列故小司寇掌其政朝士掌建其塗外朝特
詳位定然後為之禁慢朝錯立族談者司士所正者羣
臣之位朝畢則退大僕掌正王位則無往不從故云入

亦如之小司寇主於詢天下之政其位止於公卿大夫庶民而已朝士專掌外朝之灋則諸侯以至羣士羣吏咸在焉欲肅其儀必建其灋按先鄭之釋朝士外朝在路門外而康成援郊特牲小宗伯之文證之誠足以破後學之惑至小司寇之外朝則曰在雉門外何歟賈公彥為之說曰在雉門外則亦在庫門外要當以是說為正云

周覲禮 殷朝法 周明堂朝位

儀禮覲禮第十覲禮至於郊王使人皮弁用璧勞侯氏
亦皮弁迎于雉門之外遂弁受玉侯氏用束帛乘馬摠
使者天子賜舍曰伯父女順命于王所賜伯父舍天子
使大夫戒曰某日伯父帥乃初事侯氏再拜稽首諸侯
前朝皆受舍于朝同姓西面北上異姓東面北上侯氏
裨冕釋幣于禰乘皂車載龍旂弧韜乃朝以瑞玉有繅
天子設斧依於戶牖之間左右几天子衮冕負斧依璿
夫承命告于天子司空天子曰伯父實來予一人嘉之

伯父其入予一人將受之侯氏入門右奠圭取圭升致命王受之升成拜乃出四享皆束帛加璧庭實惟國所
有事畢天子辭於侯氏曰伯父歸寧乃邦侯氏再拜稽
首升成拜降出天子賜以車服迎于外門外再拜路先
設西上路下四亞之乘馬也重賜無數在車南諸公奉篚

服加命書于上太史是右侯氏升西面立太史述命加
書于服上侯氏受饗禮乃歸諸侯覲于天子為宮方三
百步四門壇十有二尋深四尺加方明于其上

方明者
上下四

方神明之象 司儀將合則令為壇三成宮 旁一門詔王儀南鄉見諸侯注引覲禮 方明者木也

方四尺設六色青赤白黑玄黃設六玉上圭下璧南方
璋西方琥北方璜東方圭天子乘龍戴大旂象日月升
龍出拜日於東門之外反祀方明禮日於南門外禮月
與四瀆於北門外禮山川丘陵於西門外記几俟于東
箱偏駕不入五門奠圭于纁上 郊特牲覲禮天子不

下堂而見諸侯

詩正義王唯覲禮不下堂而見諸侯其朝宗當迎之故秋官說車迎之法賓主

數 明堂位周公朝諸侯于明堂之位 六年天子負斧依

南鄉而立

為斧文屏風於戶牖間在明堂中央太室

三公中階之前北面東

上諸侯之位阼階之東西面北上諸伯之國西階之西

東面北上諸子之國門東北面東上諸男之國門西北

面東上

注朝位之上上近主位尊也正義三公則東上侯尊於伯故在東子尊於男亦在東

九夷

之國東門之外西面北上八蠻之國南門之外北面東

上六戎之國西門之外東面南上五狄之國北門之外

南面東上九采之國應門之外北面東上

注九采九州之牧典貢職

者正門謂之應門二伯帥諸侯而入九牧居外而糾察之正義王制云千里之外曰采皇氏云在應門外之西

伯既領之入應門牧居應門
外糾察諸侯後入不如儀者
四塞世告至
夷鎮蕃三服在四方

為蔽塞蕃
國世一見
此周公明堂之位也明堂者明諸侯之尊卑

也
大司馬云設儀辨位以等邦國朝於此所以正儀辨等陸氏曰九采之國所謂要服荒服是與周書明

堂篇第五十
五與禮記同
王制諸侯之於天子比年一小聘三年

一大聘五年一朝注比年每歲也小聘使大夫大聘使

卿朝則君自行然此大聘與朝晉文霸時所制也虞

夏之制諸侯歲朝周之制侯甸男采衛要服六者各以

其服數來朝
曲禮注諸侯春見曰朝受摯於朝受享

於廟

生氣

秋見曰覲一受之於廟

殺氣

朝者位於內朝

而序進覲者位於廟門外而序入王南面立於依寧而

受焉夏宗依春冬遇依秋覲禮今存朝宗遇禮今亡

左傳晉侯出入三覲康有酆之朝

注朝諸侯

叔向曰明王之

制使諸侯歲聘以志業間朝以講禮再朝而會以示威

再會而盟以顯昭明

注凡八聘

四朝再會王

一巡守盟于方嶽之下

又曰會朝

禮之經也禮政之興也遠啓疆曰朝聘有珪享覲有璋

小有述職大有巡功設几而不倚爵盈而不飲宴有好

貨殮有陪鼎入有郊勞出有贈賄禮之至也 公羊傳

諸侯時朝乎天子天子之郊諸侯皆有朝宿之邑焉注
時朝者順四時而朝也五年一朝 詩韓奕韓侯入覲

以其介圭入覲于王王錫韓侯淑旂綏章簟茀錯衡玄

衮赤舄鈎膺鏤錫脩革金厄 采菽君子來朝何錫予

之路車乘馬玄衮及黼言觀其旂其旂淠淠鸞聲噦噦

車攻四牡奕奕赤芾金縢會同有繹序云宣王復會諸

侯于東都 清廟序周公成洛邑朝諸侯率以祀文王

周官六年五服一朝又六年王乃時巡考制度于四

岳諸侯各朝于方岳大明黜陟秋官大行人掌大賓

之禮大客之儀以親諸侯

大賓要服以內諸侯大客謂其孤卿

春朝諸侯

而圖天下之事秋覲以比邦國之功夏宗以陳天下之

謨冬遇以協諸侯之慮時會以發四方之禁殷同以施

天下之政

注此六事以王見諸侯為文

時聘以結諸侯之好殷類以

除邦國之慝

此二事亦以王見諸侯之臣使來者為文

間問以論諸侯之志

歸賑以交諸侯之福賀慶以贊諸侯之喜致禴以補諸

侯之裁

此四者王使臣於諸侯之禮

以九儀辨諸侯之命等諸臣之

爵上公諸侯伯子男之禮大國之孤諸侯之卿及

其大夫士侯服歲壹見甸服二歲壹見男服三歲

壹見采服四歲壹見衛服五歲壹見要服六歲壹

見九州之外謂之蕃國世壹見各以其所貴寶為

摯天官掌舍掌王會同之舍設楹桓再重 大

朝覲會同大宰贊玉幣玉獻玉几玉爵

注大會同或於春朝或於

秋覲王朝諸侯立依前南面其禮之於階上

小宰以灋掌戒具宰夫掌牢

禮殮牽陳數

注凡此禮陳數存可見者有行人掌客及聘禮公食大夫

掌次張大次

小次幕人共帷幕幄帟綬大宗伯為上相

出接賓曰擯入詔禮曰相

小宗伯肆儀為位肆師佐擯共設匪壘之禮司几筵王

位設黼依之前南鄉設蒲筵紛純加纁席畫純加次席

黼純左右玉几典瑞公侯伯圭纁三采三就子男二采

再就以朝覲宗遇會同于王大史以書協禮事

小史佐之

常置旌門射人諸侯在朝則皆比面詔相其灋作大夫

介注引禮司士凡會同作士從節服氏掌朝覲衮冕六人

維太常齊僕馭金路以賓校人毛馬而頒之車僕共
革車大司寇前王小行人協九儀賓客之禮司儀掌
九儀擯相之禮為壇三成宮旁一門詔王儀南鄉見
諸侯象胥受國客幣掌客具饗禮 柳宗元曰古者旦
見曰朝暮見曰夕詩莫肯朝夕傳朝而不夕禮記日
入而夕朝不廢朝暮不廢夕晉叔向夕楚右尹子革
夕齊子我夕趙文子磬其椽張老夕知襄子為室士
茁夕皆暮見也漢儀夕則兩郎向瑣闈拜謂之夕郎

亦出是名也 明堂之朝位詳於諸侯而僅載四夷者
聖人每詳內而畧外也王會篇之朝位詳於四夷而畧
於諸侯者遠人自面內而嚮化也 車輅前陳旗物森
列金石在虞琛贄充庭璫旒袞舄天臨乎其上簪綈舄
履星拱乎其下

王會

見後

朝事儀

記玉藻疏朝事儀云冕而執鎮圭帥諸侯朝日於東郊

王制疏覲禮云天子乘龍載大旂拜日於東門之外反
祀方明鄭注引朝事儀曰天子冕而執鎮圭尺有二寸
云帥諸侯而朝日於東郊所以教尊尊也退而朝諸侯
周禮注朝士儀曰奉國地所出物而獻之明臣職也

孔子聘辭

左傳襄二十七年六月丁未朔宋人享趙文子叔向為
介司馬置折俎禮也仲尼使舉是禮也以為多文辭
杜氏注因享宴之會展賓主之辭服虔云以其多文辭

故特舉而用之後世謂之孔氏聘辭以孔氏有其辭故傳不復載也正義所言孔氏聘辭不知事何所出實享禮而謂之聘舉舊辭而目曰孔氏事亦不必然也昭四

年左師獻公合諸侯之禮六子產獻伯子男會公之禮

六昭九年孟僖子如齊殷聘禮也

禮大行人凡諸侯之邦交歲相問殷相

聘世相朝聘禮有上介衆介至所聘之國誓于其境則史讀書司馬執策賈人拭玉有司展幣

經書

公如京師者一朝于王所者二卿大夫如京師者五書

天王來聘者七錫命者三君臣上下之分易矣 聘義

曰天子制諸侯比年小聘三年大聘 王制曰諸侯
之於天子比年一小聘三年一大聘五年一朝注小
聘使大夫大聘使卿朝則君自行然此大聘與朝晉
文霸時所制也虞夏之制諸侯歲朝周制各以服數
來朝

漢長樂宮朝儀

叔孫通傳

見禮制類

漢未央宮大朝

史記高帝九年未央宮成大朝諸侯羣臣置酒前殿奉
玉卮為太上皇壽

漢明堂朝諸侯 明堂上壽 明堂上計

武紀元封元年夏四月癸卯上還登封泰山降坐朝堂

此古明堂二年秋作明堂於泰山下即奉高縣五年春三月還至

泰山增封甲子祀高祖于明堂以配上帝因朝諸侯王
列侯受郡國計天漢三年三月行幸泰山封祀明堂
因受計大始四年三月壬午祀高帝于明堂因受計三受

計元封
天漢太始

郊祀志天子從禪還坐明堂羣臣更上

壽下詔改元封元年 免寬傳從東封泰山還登明堂

寬上壽曰陛下合指天地祖立明堂辟雍宗祀泰一臣

寬奉觴再拜上千萬歲壽制曰敬舉君之觴 蕭由傳

由治郡有聲元始中作明堂辟雍大朝諸侯召由為大

鴻臚會病不及賓贊

此長安明堂

後儒林傳序明帝坐明

堂朝羣后

漢甘泉朝諸侯

武紀太初元年受計于甘泉

師古曰郡國所上計簿若今諸州計帳

計天漢

四年春正月朝諸侯于甘泉宮後元二年正月朝諸侯

于甘泉宮賜宗室志方士多言帝王有都甘泉者其

後天子又朝諸侯甘泉甘泉作諸侯邸白奴傳甘露

三年正月單于朝天子于甘泉宮寵以殊禮位在諸侯

王上贊謁稱臣而不名

待以客禮龍駕帝服鳴鐘傳鼓於清渭之上南面朝單于

漢中朝 外朝 內朝

傳劉輔上書繫獄中朝左將軍辛慶忌右將軍康褒光

祿勳師丹大中大夫谷永俱上書云云注孟康曰中朝內
朝也大司馬左右前後將軍侍中常侍散騎諸吏為中
朝丞相以下至六百石為外朝 王嘉事下將軍中朝
者龔勝為光祿大夫尚書劾奏王嘉下將軍中朝者
議勝獨書議 楊惲中書謁者令宣持單于使者語視
諸將軍中朝二千石 韋玄成詔中朝臣具復毀廟之
文 洎勳奏丞相宣願下中朝特進列侯將軍以下正
國法度 朱博有詔左將軍彭宣與中朝者雜問制將

軍中二千石諸大夫博士議郎議師丹人上書告丹

上以問將軍中朝臣 蕭望之五鳳中詔遣中朝大

司馬車騎將軍諸吏光祿勳大僕問望之計策

翟方進奏陳咸不當蒙方正舉備內朝臣

咸為光祿大夫

給事中 成紀建始元年未央宮殿中朝者坐注晉

灼曰內朝臣之朝坐也服虔曰公卿以下朝會坐

也 後鄧后紀元初五年劉毅上書曰正位內朝

流化四海 周禮注司徒府中有百官朝會殿天子

與丞相決大事是外朝之存者 傳嚴助為中大夫

公孫弘朝覲奏事因言國家便宜上令助等與大臣

辨論中外相應以義理之文大臣數詘 蕭望之故

事御史大夫朝奏事會庭中差居丞相後望之與鈞

禮 元帝詔望之給
事中朝朔望

王商河平四年單于來朝引見

白虎殿丞相坐未央庭中單于前拜謁 西都賦左

右庭中朝堂百僚之位

漢九賓

又見
禮制

叔孫通傳長樂宮朝設九賓臚傳

劉敞謂擯者九人

蔡質漢儀

德陽殿朝賀作九賓徹樂

百官表大鴻臚注應劭曰

郊廟行禮讚九賓鴻臚傳之也

續官志鴻臚屬官

治禮郎四十七人注東觀書曰主齋祠僧贊九賓禮

儀志大鴻臚設九賓注薛綜曰九賓謂王侯公卿二千

石六百石及郎吏甸奴侍子凡九等東京賦九賓重

臚人列注引韋昭曰周禮九儀謂公侯伯子男孤卿大

夫士也史記秦設九賓於庭

漢諸王朝京師

後紀顯宗永平二年九月沛王輔楚王英濟南王康淮陽王延東海王政來朝六年正月沛王輔等九人來朝十一年正月沛王輔等八人來朝肅宗建初七年春正月沛王輔濟南王康東平王蒼中山王焉東海王政琅邪王宇來朝傳東平王蒼永平十一年蒼與諸王朝京師建初六年冬上䟽求朝明年正月帝許之賜裝錢千五百萬諸王各十萬帝賜蒼貂裘及太官食物珍果

使大鴻臚賈固持節郊迎親循行邸第錢帛器物充備
下詔曰禮云伯父歸寧乃國詩云叔父建爾元子敬之至
也昔蕭相國加以不名優忠賢也況兼親尊者乎其沛
濟南東平中山四王讚皆勿名蒼既至升殿乃拜天子
親答之其後諸王入宮輒以輦迎至省閣乃下蒼辭曰
既賜奉朝請咫尺天儀而親屈至尊降禮下臣每賜燕
見輒興席改容中宮親拜事過典故三月大鴻臚奏遣
諸王歸國帝特留蒼賜以祕書列仙圖道術祕方至八

月飲酎畢有司復奏遣乃許之 廣陵侯元壽建初七

年肅宗詔元壽兄弟與諸王俱朝京師廣陵王荆之子 中山

王焉永平二年冬諸王來會辟雍事畢歸蕃焉與俱

就國從以虎賁官騎 北海敬王睦永平中歲終

遣中大夫奉璧朝賀 第五倫傳建武二十七年

補淮陽醫工長二十九年從王朝京師隨官屬得

會見帝問政事大悅明日復召入 史記褚

先生曰諸侯王朝見天子漢法凡當四見始到

入小見正月朔旦奉皮薦璧玉賀正月法見後三日為
王置酒賜金錢財物後二日復入小見辭去凡留長安
不過二十日小見者燕見於禁門內飲於省中非士人

所得入也

漢之儀法朝見賀正月者常一
王與四侯俱朝見十餘歲一至

高紀十一

年二月令諸侯王通侯常以十月朝獻 哀紀嗣為定

陶王元延四年入朝盡從傅相中尉時中山孝王亦來
朝獨從傅上怪之以問定陶王對曰令諸侯王朝得從
其國二十石故盡從之他日問中山王獨從傅在何法

令不能對成帝由此賢定陶王 宋志班固禮樂郊祀
馬彪祭祀禮儀祭邕朝會董巴輿服並各立志

漢朝會見諸儒

魯丕傳永平十一年遷中散大夫和帝因朝會召
見諸儒丕與侍中賈逵尚書令黃香等相難數事
帝善丕說罷朝特賜冠幘履鞮衣一襲 京房嘗
宴見注以閒宴時入見天子 馬援引見數十

每接燕語

漢會見儀適

竇融傳建武八年夏車駕西征隗囂融率五郡太守與

大軍會高平第一

高平有第一城

融先遣從事問會見儀適

猶注

言儀注也

是時軍旅諸將與三公交錯道中或背使者交相

語帝聞融先問禮儀甚善之以宣告百僚乃置酒

高會引見融等待以殊禮隴蜀平詔與五郡守奏

事京師引見就諸侯位 建武四年馬援引見宣

德殿

漢奉朝請

宣紀時會朝請舍長安尚冠里注歲時隨宗室朝會宣帝

為皇曾孫奉朝請

傳吳王使人為秋請注孟康曰律春曰朝秋

曰請如古諸侯朝聘也石奮歸老于家以歲時為朝臣

注豫朝請張禹以特進奉朝請傅喜位特進奉朝請

馮參以列侯奉朝請杜緩前免太常以列侯奉朝請

蕭望之給事中朝朔望坐次將軍蘇武以著節老臣令

朝朔望光為大師有詔朝朔望後官志列侯奉朝請

在長安位次三公

前漢

漢官解詁三輔職如郡守獨奉

朝請

列侯奉朝請

後漢冠鄧耿賈加特進朝請而已

建武十三年

耿弇馬武劉賜

十四年陳俊

十五年臧宮朱祐

十九年鄧晨

劉隆

梁統

鄧禹李通以特進

奉朝請

鄧騭永初中奉朝請位在三公下特進

侯上有大議詣朝堂與公卿參謀

顯宗拜鄧禹

太傅進見東向

永平中幸宛詔諸李隨安

衆宗室會見

李通傳

建武七年王常拜橫野將軍位

次與諸將絕席八年隗囂衆潰置酒高會勞賜中郎將
來歙班坐絕席在諸將之右九年郭伋拜潁川守召見
辭謁十九年拜桓榮議郎每朝會令榮於公卿前敷奏
經書二十八年大會百官問誰可傅太子 宣秉拜御
史中丞帝特詔中丞司隸校尉尚書令會同並專席而
坐京師號三獨坐 鄧太后以張禹為太傅朝見特贊
與三公絕席

魏百官班次

晉官志魏置謁者僕射掌天拜授及百官班次統謁者
十人

唐朝集上計

會要貞觀元年十二月許梁州都督竇軌入朝問風俗
十五年正月上曰古諸侯有湯沐邑漢故事立邸舍十
七年十月朔詔為諸州朝集使造邸第三百餘所二十
年有司言漢儀注朝賀正月常一王四侯十餘歲一至
請每歲二王入朝禮畢還藩開元八年十月敕都督刺

史上佐每歲分番朝集十月二十五日至京十一月朔
見二十二年詔十日一參大厯十四年敕諸州刺史入
計如式元和十四年八月魏博田弘正來朝賜宴麟德
殿五年十二月義武張茂昭朝京師故事雙日不坐是
日特開延英

唐宣政殿受朝 朔望宣政殿受朝

會宴開元中蕭嵩奏每月朔望受朝於宣政殿先列仗衛
及文武四品以下於庭侍中奏外辦上乃步自西序門

出升御坐朝罷起步入東序門然後放仗臣以宸儀肅
穆升降俯仰衆人不宜得見乃請備羽扇於殿兩廂上
將出索扇扇合上坐定去扇將退又索扇如初天寶十
二載十一月中丞奏京官朔望朝參著朱衣袴褶五品

以上珂傘

詳見冕服

建中元年十一月朔

辛酉

御宣政殿見朝

集使及貢士

州府計吏至者一百七十有三

兵興州郡不上計內外不

會同者廿五年至是始復舊典貞元七年四月二十八

日戊午詔每歲五月一日御宣政殿見臣僚京官九品以

上外官因朝奏在京者並就列令有司重定儀注頒示

永編禮式

本以五月一日陰生臣子道長君父道哀非善月也

八年五月

乙丑朔十

四年五月朔宣政受朝見元和三年四月丁丑以術數之

說禮經不載遂罷之

先是創有是禮亦不多行

十年三月朔壬申御延

英殿對宰臣故事朔望御宣政殿見羣臣謂之大朝立

宗始以陵寢薦食不聽政後遂以為常舊紀貞元六

年五月丙寅朔上御紫宸受朝以是月一陰生臣子道

長父子必以是朔面焉故取朔日受朝七年四月戊午

詔仲夏之時萬物敷暢陽德方茂陰事始承昔者觀其
法象因天地交會之序為父子相見之儀豈隔於君臣
之際起今年五月朔御正殿召見文武百官外官因朝
奏咸聽就列仍編禮式以為常典五月庚申朔上御宣
政殿見百官從新制也元和三年四月丁丑勅五月一
日御殿受朝賀禮宜停 會要貞觀十三年房元齡請
三日一臨朝二十三年詔每日常坐顯慶二年隔日

視事

六典注永徽二年詔
太極殿五日一視事

紀唐制以隻日視朝文

宗用雙日貞元十八年七月乙亥罷正衙奏事 六

典正至御承天門以聽政

古之外朝

朔望坐建極視朝

古之

中朝皆常日兩儀殿聽朝視事

古之內朝

國史慶曆七年

詔讀時令禮院約定儀注以通禮參用唐宣政殿朔望朝參儀草定

唐紫宸殿入閣儀

官志起居舍人若仗在紫宸內閣夾香案分立殿下監察御史開元七年詔隨仗入閣左右翊中郎將入閣日

一人升殿受狀 會安貞觀五年正月詔諫官隨中書

門下及三品官入閣貞元七年十一月詔常參官入閣

不得奔走故事朔望日御宣政殿見羣臣謂之大朝

立仗

正或御紫宸殿則喚仗自宣政兩閣入所謂東西上閣

門也自玄宗前未有此制開元後以朔望上盤食玄宗

欲避正殿遂移紫宸殿喚仗自閣門入始有入閣之名

敬宗寶歷初始以月朔御紫宸殿入閣開成元年正月

已詔入閣日次對官班退立於東階松下須宰臣奏事

畢齊至香案前各言本司事左右起居又待次對官奏事

畢方出

敬宗長慶四年正月即位二月辛丑御紫宸殿羣臣初展入閣之儀

五代會要唐制

常參官每日朝退賜食謂之廊餐自乾符後月旦入閣日賜食禮畢閣門宣放仗羣臣俱拜謂之謝食五代史李琪傳

唐末喪亂朝廷禮壞天子未嘗視朝而入閣之制亦廢常參

官日至正衙者聞傳不坐即退獨大臣奏事日一見便殿而

侍從內諸司日再朝而已明宗即位

後唐

乃詔羣臣五日一

隨宰相入見內殿謂之起居李琪謂非唐故事請罷五日

起居而復朔望入閣明宗曰五日起居吾思數見羣臣不

可罷而朔望入閣可復

會要天成元年十一月乙酉詔朔望賜百官廊下餐

然唐故

事天子曰御殿見羣臣曰常參朔望薦食諸陵寢有思慕

之心不能臨前殿則御使殿曰入閣

玄宗以陵寢薦食不聽政遂以為常

宣

政前殿也謂之衙衙有仗紫宸便殿也謂之閣其不御前

殿而御紫宸殿也乃自正衙喚仗由閣門而入百官俟朝

者因隨以入見故謂之入閣然衙朝也其禮尊閣宴見也

其禮殺自乾符後因亂禮缺天子不能日見羣臣而見朔望

故正衙常日廢仗而朔望入閣有儀其後習見遂以入閣為重至出御前殿猶謂之入閣至是而復然有司不能講正凡羣臣五日一見入中興殿便殿也此入閣

遺制而謂之起居朔望一出御文明殿前殿也

文明殿兩掖曰

東西上閣門

反謂之入閣琪不能正也琪又建言入閣門有

待制次對官論事而內殿起居一見而退

五代會要後唐天成元年

七月御史臺奏故事每日百官入朝百官排儀仗金吾勸契入後有待制次對官各舉論本司事左右起居分

記言動付史館編錄

欲有言者無由自陳明宗乃詔起居曰

天成元年

八月己亥御文明殿百官入閣如月朔之儀

有言事者許出行自陳又詔百

官以次轉對

文明殿即唐貞觀殿梁平二年改在洛陽

會要貞元十二

年十月御史臺奏御史內供奉者入閣日依宣政殿前

班位次員外郎之後天祐三年六月勅文武百僚每月

一入閣於貞觀殿貞觀殿朝廷正衙正至受朝賀比來

視朔未正規儀宜於崇勳殿入閣

二殿皆在洛陽崇勳殿後唐曰中興五

代會要有入閣儀開延英儀

通鑑元和十五年十月壬午羣臣入

閣退諫議大夫鄭覃等五人進言時久無閣中論事者

穆宗訝之 李渤傳敬宗晏朝紫宸入閣帝久不出
今按貞觀中已有入閣之語不待開元間退御紫宸乃
云入閣也玄宗亦曰魚袋者五品以上入閣則合符
宋庠曰坐朝日即為入閣未知何據

唐百官班序 朝參名簿

百官志御史大夫朝會則率其屬正百官之班序遲明
列於兩觀文武職事九品以上及二王後朝朔望文官
五品以上及兩省供奉官監察御史員外郎太常博士

日參號常參官武官三品以上三日一朝號九參官五
品以上及折衝當番者五日一朝號六參官弘文崇文
館國子監學生四時參凡諸王入朝及以恩追至者日
參九品以上自十月至二月袴褶以朝五品以上有珂
文武三品非職事官朝參名簿皆稱曰諸公監察御史
舉不如法者鴻臚卿凡四夷君長以蕃望高下為簿朝
見辨其等位 會要永徽元年十月五日京官文武五
品依舊五日一參神龍元年四月初令五品以上朔望參

日升殿食天寶十四載三月一日令分日入朝貞觀六年八月御史大夫責殿中侍御史唐臨以朝列不整景龍三年左臺御史崔泣彈朝班不肅舒元興御史臺中書院記御史每朝會至含元殿西廡使朱衣從官傳呼促百官就班遲曉列於兩觀之下監察二人立於東西朝堂軌道以監之雞人報點押百官由通乾觀象入宣政門及班于殿庭則左右循使二人分押於鍾鼓樓下若兩班就食廊下又分殿中一人為使莅之謁者承

旨喚仗入東西閣門分監察二人立紫宸屏下以監其
出入鑪煙起天子負斧扆聽政自螭首龍墀南屬於文
武班則侍御史一人盡得彈舉不如法者

儀衛志同

唐貞元班序勅

通典貞元二年九月五日勅文武百官朝謁班序中書
門下各以本官序供奉官在橫班序若入閣則各隨左
右省主御史大夫中丞侍御史在左殿中侍御史在右
通事舍人分左右立文武官行立班序通乾觀象門

外序班武次文

含元殿前龍尾道下叙班舊無此儀唯合於通乾觀象門南序班

至宣

政門文由東門入武由西門入至閣門亦如之退朝從

宣政西門出

周禮先叙六官六典尚書省官本每班請以尚書省為首

會要貞元

二十年十月御史中丞奏准貞元二年班序勅三院御

史常參官兼者入本官班如內供奉裏行入御史班二

十一年五月又奏准貞元班序勅云云橫行位次依本

班先後

唐朝位

百官志御史臺凡朝位以官職事同者先爵爵同以齒致仕官居上職事官與散官勳官合班則文散官居職事之下武散官次之勳官又次之官同者異姓為後親王嗣王任文武官者從其班官卑者從王品郡王任三品以下職事者居同階品之上非任文武官者嗣王居太子太保之下郡王次之國公居三品之下郡公居從三品之下縣公居四品之下侯居從四品之下伯居五品之下子居從五品之上男居從五品之下以前官

召見者居本品見任之上以理解者居同品之下本司
參集者以職事為上下文武三品非職事官者朝參名
簿皆稱曰諸公

建隆崇元殿入閣

建隆元年八月戊辰朔御崇元殿

即天安殿宋太祖五行其禮然御前殿非

唐舊矣

設仗衛百官入閣置待制候對官仗退賜廊下食

廊下食起唐貞觀

三年八月丙戌朔御崇元殿入閣實儀待制

邊元範候對十一月乙卯朔御崇元殿入閣趙矩待制

張澹侯對四年四月壬午朔帝服通天冠絳紗袍御崇

元殿視朝設金吾仗入閣艾穎待制馬士元侯對八月庚辰

朔亦如之乾德四年四月丙申朔御文明殿入閣即文德殿一云大

明殿國史云文明當考太平興國二年閏七月丁巳有司言八

月一日入閣舊儀軍校等不入殿庭起居文武官至位

跣踏疾趨入沙墀再拜鞠躬不呼萬歲望如冬至朝賀

例軍校陪位拜舞禮畢先退門外序立文武官舞蹈如

中書門下班從之制下會雨而止

建隆合班儀

乾德定內外官儀制
祥符定羣臣儀制

建隆三年三月壬午

二十三日

有司上重定合班儀制先是

乙亥詔學士班侍郎之上升六曹侍郎在給舍上郎中

在補闕上員外郎在拾遺上節度使在六曹侍郎上中

書侍郎下

餘如故

乾德二年二月戊申朔重定內外官儀

制

有司請上將軍在中書侍郎下大將軍在少卿監下諸衛率副率在東宮五品下

淳化三年

八月有司重定合班儀升尚書令於三師之上

時將畫正仗圖

欲備官故也

五年六月甲辰詔翰林學士班丞郎之上 祥

符元年正月庚寅

二十日

有司上都亭驛醮宴班位圖天

禧三年十一月辛酉

九日

閣門上大禮稱慶合班圖

皇太子位

在宰相上太子
懇辭再請乃許

祥符五年命學士李宗諤陳彭年詳

定羣臣儀制九月丁丑奏百官避宰輔及斂馬分路之

制 景祐五年八月閣門詳定合班雜坐儀七年五月

癸卯知雜御史王隨請以御史臺新降條目編為儀制

從之立班圖

見圖類

又見禮制類

建隆五月朔受朝

三年五月癸亥朔御崇元殿受朝

服通天絳
紉陳儀衛

天聖三

年四月上問五月一日御殿故事王欽若對唐以陰氣始盛設君臣相見之儀然近歲未嘗行癸亥詔權停

視朔御殿非古也唐德宗以術數之說肇行斯禮元和中以不經罷之後唐同光中復舉行至是猶循舊制熙寧二年罷之

太平興國乾元殿受朝

五月朔如
冬正儀

三年三月己酉吳越王俶入朝見於崇德殿寵賚甚厚

賜宴長春殿四月己卯平海節度陳洪進獻漳泉二州
得縣十四五月乙酉朔御乾元殿受朝伏衛如冬正儀
赦漳泉是日敕上表獻所管十三州一軍凡得縣八十六

淳化文德殿入閣 儀注 入閣圖 祥符

入閣圖

淳化二年十一月詔以來月朔御文德殿入閣令史館
修撰楊徽之張洎與有司取舊圖定儀注以聞洎上奏
曰按今之乾元殿即唐含元殿也在周為外朝唐為大

朝冬至元日設仗衛朝萬國在此殿今之文德殿即唐
宣政殿也在周為中朝在漢為前殿在唐為正衙凡朔
望起居凡冊后妃太子王公大臣對四夷君長試制策
舉人在此殿也今之崇德殿即唐紫宸殿也在周為內
朝在漢為宣室在唐為上閣即隻日常朝之殿也東晉
太極殿有東西閣唐制紫宸上閣法此制也所謂入閣
者蓋隻日御紫宸上閣之時先於宣政殿前立黃麾金
吾仗俟勘契畢喚仗自東西閣門入故謂之入閣今朝

廷以文德正衙權為上閣非憲度也切見長春殿正與文德殿南北對請改叔此殿以為上閣作隻日立仗視朝之所其崇德崇政殿即唐之延英殿也為隻日常時聽斷之所疏入不報上以入閣舊圖承五代草創禮容不備命徽之等討論故事別為新圖十二月丙寅朔上御文德殿羣臣入閣禮畢賜百官廊下食唐制朔望天子御宣政殿受百官起居及諸司奏事仗衛如式敬宗始於紫宸殿展入閣之儀三年五月甲午朔御文德殿

羣臣入閣先是舊制入閣惟殿中省細仗隨兩省供奉
官先入陳於廷上以為儀衛太簡命有司增設黃麾仗

二百五十人其殿中省細仗仍舊

唐以月朔行之後唐天成初又以月望

咸平二年八月辛亥朔御文德殿羣臣入閣

孫何待制

祥符三年閏二月辛亥朔

李迪待制杜夢證候對

七年四月

二日東上閣門使魏昭亮言閣門入閣圖殿上侍立

臣僚皆唐時職官與聖朝名品不同望依新定儀制

別畫副本有司永為定制詔禮儀院詳定 國史李

淑傳議入閣曰唐寶曆後常以月朔御紫宸行入閣儀聖朝太祖五行其禮多御崇元殿備殿中金吾諸仗設待制候對官崇元即今天安殿也乾德之後改御大明殿即今集英太宗三行其禮別定新儀就文德廷增設黃麾仗真宗亦三行之繪圖講習藏之禁閣

藝文志景祐三年詔賈昌朝與丁度李淑采國朝律歷典禮日度昏曉中星祠祀配侑歲時施行者約唐月令定為時令一卷以備宣讀而淑定入閣儀異於通禮明年

詔因入閣讀時令尋停 張洎傳淳化中上令史館修
撰楊徽之等四人修正入閣舊圖洎同奉詔因詔討論
入閣故事獨草奏以聞又請準舊儀侍從官先入起居
畢分行侍立於丹墀之下謂之蛾眉班然後宰相相率
正班入起居唐初五日一朝景雲初始修貞觀故事肅
宗而下咸隻日臨朝雙日不坐 雙日宰相當奏事特開
延英召對或蠻夷入貢
勳臣歸朝亦特
開紫宸引見 望依舊規隻日視朝雙日不坐其隻日
於崇德崇政兩殿召對宰臣常參官以下及非時蠻夷

入貢獻臣歸朝亦特開上閣引見奏入不報

景祐定入閣儀注

景祐三年正月丙午詔知制誥李淑等重修閣門儀制
其入閣儀注頗省去煩文四年二月二十二日庚子詔
五月朔行入閣之禮仍讀時令先是詔國朝時令委編
修官約唐月令撰定以備宣讀於是賈昌朝等采國朝
律令典禮日度昏曉中皇及祠祀配侑諸事當以歲時
行者改定為一篇上之遂詔因入閣行其禮 寶元二

年十二月十二日戊辰參政宋庠言近奉德音詢及入閣故事臣雖畧陳梗槩理有未詳退而講求故事夫入閣乃有唐隻日於紫宸殿受常朝之儀也謹按唐有大內有大明宮宮在大內之東北世謂之東內謂大內為西內自高宗以後天子多在大明宮宮之正門曰丹鳳門門內第一殿曰含元正至大朝會則御之對北第二殿曰宣政謂之正衙朔望大冊拜則御之對北第三殿曰紫宸謂之上閣亦曰內衙隻日常朝則御之據唐制

凡天子坐朝必須立仗於正衙或乘輿止御紫宸即喚
正衙仗自宣政殿兩門入是謂東西上閣門也以國朝
之制相比則今之宣德門唐丹鳳門也大慶殿唐含元殿
也文德殿唐宣政殿也紫宸殿唐紫宸殿也今欲求入
閣本意施於儀典即須先立仗於文德之廷如天子止
御紫宸則喚仗自東西閣門入如此則差與舊儀相合
但今之諸殿比於唐制南北不相對以此為異耳又按
唐自中葉以還雙日及非時大臣奏事別開延英殿賜

對若今假日御崇政延和是也乃知唐世每遇坐朝之日即為入閣而叔世離亂五朝草創大昕之制更從易簡正衙立仗因而遂廢其後或有行者常人所罕見乃復謂之盛禮甚不然也今相傳入閣圖者是官司記常朝之制如閣門有儀制勅合班雜坐圖之類何足為希闊之事哉况唐開元舊禮本無此制至開寶中諸儒增附新禮始載月朔入閣門之儀又以文德殿為上閣差舛尤甚蓋當時編撰之士討求未至太宗朝儒臣張洎

論奏頗為精洽欲下兩制改正舊儀詔兩制詳定學士

丁度等奏今殿閣與唐制不同宜且仍舊從之

慶曆七年三月

戊子詔權停所上立夏讀時令儀

熙寧三年五月知制誥宋敏求言

奉詔詳定閣門儀制如文德殿入閣當御紫宸殿方

合舊制詔學士議承旨王珪言入閣者乃唐朝隻

日紫宸受常朝之儀非盛禮壬子詔罷之

二十三日學士

院奏六月九日閣門奏文德殿無受朝儀下兩制詳定

景祐百官表位

景祐四年九月庚戌詔閤門於紫宸垂拱殿刊石為百官表位嘉祐四年六月二十四日御史臺請於紫宸垂拱兩殿庭石位鐫定班次以官位序班員多者重行員少者合班序立 太平興國五年九月丁未詔曰表著之設蓋有等威闕庭之儀所務恭肅故離立族談者罰之所及蹴芻齒路者誅之必加所以辨名器之差正班爵之序賈生設堂陛之喻蓋明天子之尊叔孫

造縣範之文式彰王者之貴 李宗諤言朝會圖

門下省典儀設版位御史中丞班在丹墀上兩省

官後立

熙寧文德殿視朝儀 正衙視朝之儀

志三年

會要二年六月九日

修閣門儀制宗敏求言本朝唯入閣

御文德殿

司馬光言文德殿為天子正衙

今不用入閣儀遂闕視朝之

禮請下兩制及禮院約唐御宣政殿制裁定為文德殿

朔望視朝之制詔學士院詳定四年正月甲寅學士韓維

等上其儀以入閣舊圖增損裁定具儀前一日供
帳於殿庭金吾執儀刀天武執繖扇黃麾告止傳
教信幡龍頭竿戟列于東西門外立仗青龍五嶽
五龍旗列于東白虎五星五鳳旗列于西御馬東
西皆五匹設御幄于殿後閣其日金吾押本衛仗
殿中省押細仗東西對列四年五月乙酉朔初視
朝于文德殿 元豐四年五月十九日視朝 天
禧五年十月十日中書密院請準故事五日一御便

殿 皇祐編敕正衙常朝及橫行並宰臣立班常朝日
輪宰臣一員押班 祥符初敕宰臣依故事赴文德殿
押班 治平四年五月癸未詔春分秋分後辰正牌上
垂拱殿視事未退宰臣更不過文德殿押班 初治唐
故事百官日赴文德殿宰臣押班謂之常朝休假三日
以上內殿起居官畢集謂之橫行宰臣以下應見謝辭
者皆先赴文德殿謂之過正衙正衙謂之外朝
詣正衙方許入對 先
元豐四年御史滿中行言今垂拱內殿宰臣以下既已

日參而常朝不廢至於橫行正衙必俟天子御殿日乃
可行之虛名謬例欲望罷去十一月己酉詔從之

元豐大慶殿朝會圖

四朝志元豐元年詳定正旦儀奏用黃麾仗二年詳定
冬會等儀又言御殿儀仗有黃麾幅一而無黃麾請製
大麾帝曰姑闕之二年詳定所又言昨定朝會圖於大
慶殿橫街北止陳大輦逍遙平輦而輿未陳也當增腰
輿一小輿一改制偏扇團方扇為三等繡帷凡朝會平

輦道遙並陳東西龍墀上 政和三年四月議禮局上
大慶殿大朝會儀衛黃麾大仗五千二十五人文德殿
視朝黃麾半仗二千二百六十五人文德殿發冊黃麾
細仗一千四百二人

紹興文德殿視朝

紹興十二年十一月三日禮部侍郎王賞言朝會之制
正至及大慶賀御大慶殿與文德紫宸垂拱殿禮制不
同月朔御文德殿謂之前殿正衙設黃麾半仗紫宸垂

拱係別殿不設儀仗今欲先舉行文德殿視朝之制十三年文德殿視朝用黃麾半仗二千四百十五人六月紫宸殿望參設黃麾角仗先是十二年十月二十七日有司請講求常朝視朝正衙便殿之儀於是討論朔日文德殿視朝紫宸殿日參望參垂拱殿日參四參及垂拱紫宸殿上壽之制請先御正殿視朝時行宮止一殿乃以射殿為崇政殿朔望設帳門以為文德紫宸殿宣制以為文德殿拜表聽批荅以文德殿東上閣門又以

內諸司地為垂拱殿四參於殿門外設位版乾道二年九月七日

閣門定垂拱殿四參之儀紹興十三年二月壬戌上初御前殿特

引四參官起居自建炎以來始有此禮四月三日閣門

言垂拱殿已砌石位其字與石色一同百官難以辨認

請四參石位裝字以黃蠟日參石位以紅蠟從之四月丙戌

詔宰執四參官赴垂拱殿習看石位宋敏求曰文德殿曰外朝凡不釐務朝臣

月赴是垂拱殿曰內殿宰臣以下及武班日赴是謂常起居每五日文武朝臣赴內

朝謂之百官大起居凡三等蓋天子坐朝莫先於正衙於禮羣臣無一日不朝者正衙雖不坐常參官猶立班

俟放朝
乃退

漢宣帝地節二年五月始親政事五日

一聽事自丞相以下各奉職奏事 魏黃初五年五

月有司以公卿朔望日因奏疑事聽斷大政 王肅曰

周官五日視朝漢宣帝使公卿五日一朝成帝始置尚

書五人自是朝禮遂闕可復五日視朝之儀使公卿尚

書各以事進廢禮復興光宣聖緒 元魏孝文謂穆亮

三代之禮日出視朝漢魏已降禮儀漸殺晉令有朔望

集公卿於朝堂而論政事亦無天子親臨之文 唐每

月凡九開延英延英對宰臣日未御內殿前令閤門使
傳宣放班 高宗五日一御太極殿視事 代宗於紫
宸聽朝常限三人奏事 天禧五年十月十日輔臣請
准故事五日一御便殿及朔望坐朝

王海卷七十

欽定四庫全書

玉海卷七十一

宋 王應麟 撰

禮儀

元會

文選注董仲舒策曰春秋之文正次王王次春春者
天之所為正者王之所為三朝歲首朔日也谷永曰
三朝之會周禮曰時見曰會

漢元會儀 朝會志

晉志漢以高帝十月定秦且為歲首至武帝雖改用夏
正然每月朔朝至於十月朔猶常饗會如元正儀 宋
禮志叔孫通傳載通所制漢元會儀綱紀粗舉施於今
未備也魏黃初三年始奉璧朝賀何承天云魏元會儀
無存者案何禎許都賦曰元正大饗壇彼西南旗幕峨
峨檐宇弘深玉沈正會賦曰華幄映於飛雲朱幕張于
前庭亘青帷於兩階象紫極之崢嶸延百辟于和門等

尊卑而奉璋此則大饗悉在城外不在宮內也案魏司空王朗奏事曰故事正月朔賀殿下設兩百華燈木於二階之間端門設庭燎火炬端門外設五尺三尺鐙月照星明雖夜猶晝如此則不在城外也何王二賦不在洛京王亦賦許昌正會也晉武帝世更定元會注今有咸寧注是也 齊志漢末蔡邕立漢朝會志竟不就

元會大饗四廂樂歌辭晉泰始五年太僕傅玄撰正旦大會行禮歌詩四章壽酒詩一章食舉東西廂樂十

三章黃門郎張華作上壽食舉行禮詩十八章中書監
荀勗侍郎成公綏言數各異齊檀超傳王儉議云朝
會志前史不書蔡邕稱先師胡廣說漢舊儀此伯喈一
家之意匡衡傳成帝初上疏諸侯正月朝覲天子觀以
禮樂饗禮乃歸今正月初幸路寢臨朝賀置酒以饗
萬方

漢三朝會同

班固東都賦春王三朝會同漢京是日也天子受四海

之圖藉膺萬國之貢珍內撫諸夏外綏百蠻盛禮興樂供
帳置乎雲龍之庭陳百僚而贊羣后寃皇儀而展帝容庭
實千品旨酒萬鍾列金罍班玉觴嘉珍御太牢饗食舉雍
撤太師奏樂陳金石布絲竹鐘鼓鏗鏗管絃煜煜抗五聲
極六律歌九功舞八佾韶武備泰古畢四夷間奏德廣所
及傑侏尨離罔不俱集萬樂備百禮暨皇歡洽羣臣醉降
烟煜調元氣撞鐘告罷百僚遂退 張衡東京賦孟春元
日羣后旁戾百僚師師于斯胥洎藩國奉聘要荒來質爾

乃九賓重臚人列崇牙張鏞鼓設郎將司階虎戟交鍛龍
輅充庭雲旗拂霓夏正三朝庭燎晷晷撞洪鐘伐靈鼓稱
警蹕已下彫輦於東廂冠通天佩玉璽紆黃組要干將負
斧宸次席紛純左右玉几穆穆而南面以聽矣然後百辟
乃入司儀辨等尊卑以班璧羔皮帛之贄既奠天子乃以
三揖之禮禮之穆穆焉皇皇焉濟濟焉將將焉信天下之
壯觀也 前樂志凡鼓十二朝賀置酒陳殿下應古兵法
凡鼓八朝賀置酒陳前殿房中不應經法朝賀置酒為樂

楚巴鈿齊四會蔡齊謳皆鄭聲可罷

漢德陽殿朝賀 元會儀

禮儀志歲首為大朝受賀其儀夜漏未盡七刻鐘鳴受
賀及贄公侯壁中二千石二千石羔千石六百石鴈四
百石以下雉百官賀正月二千石以上上殿稱萬歲舉
觴御坐前司空奉羹大司農奉飯奏食舉樂百官受賜
宴饗大作樂後漢先上壽次賜酒與叔孫儀不同注蔡質漢儀曰正月旦
天子幸德陽殿臨軒公卿將大夫百官各陪朝賀蠻貊

胡羌朝貢畢見屬部計吏皆陞觀庭燎宗室諸劉雜會

萬人以上太官賜食酒御史四人執法殿下虎賁羽林

弧弓撮矢陸戟左右作九賓徹樂舍利

舍利獸名即西京賦所云舍利

既既化為仙車驪駕四鹿芝蓋九葩

從西方來戲於庭乃入激水化比目

魚作霧鄣日化成黃龍炫曜日光樂畢作魚龍曼延小

黃門吹三通謁者引公卿羣臣以次拜其每朔惟十月

旦從故事者高祖定秦之月元年歲首也 晉樂志鐸

舞歌幡舞歌各一篇鼓舞伎六曲並陳於元會後漢正

旦天子臨德陽殿受朝賀 漢儀有正會禮見後

列傳范升建武四年正月朝公卿大夫博士見於

雲臺 戴憑正旦朝賀帝令羣臣說經更相難詰

義不通者奪席儒林 虞延建武二十三年元正朝

賀帝望而識延 朱暉永平初正月朔旦東平王

蒼當入賀故事少府給壁時陰就為少府驕不奉

法蒼坐朝堂漏且盡求壁不可得暉望見少府主

簿持壁即往給之主簿以授暉顧召令史奉之就

更以他壁朝 鄭弘元和元年為太尉以舉將司
空第五倫班在下每正朔朝見弘曲躬自卑帝置
雲母屏隔其間 帝紀明帝永平元年正月帝率
公卿以下朝於原陵如元會儀 安帝永初四年
正月元日會徹樂不陳充庭車注每大朝會必陳
乘輿法物車輦於庭

魏文昌殿正會 小會

魏都賦置酒文昌高張宿設有客祁祁載華載裔爰爰

冠縱纍纍辮髮清醑如濟濁醪如河涼醴流漸溫耐躍
波豐肴衍衍行庖皤皤悒悒醞燕酣滑無譁延廣樂奏
九成云云 曹植有元會詩

晉元會儀 咸寧注 元正宴會詩 賦

晉禮志五禮三日賓蓋朝覲宗遇會向之制是也漢儀
有正會禮正旦夜漏未盡七刻鐘鳴受賀公侯以下執
贄來庭二十石以上升殿稱萬歲然後作樂宴饗魏武
帝都鄴正會文昌殿用漢儀設百華燈晉武帝更定元

會儀咸寧注是也傳玄元會賦曰考夏后之遺訓綜殷

周之典藝採秦漢之舊儀定元正之嘉會則兼採衆代

可知矣 咸寧注唐志咸寧起居注二十二卷先正一日宿設夜漏未

盡十刻羣臣集庭燎起火七刻百官及受贄郎官至計

吏皆入立其次陞衛如臨軒儀五刻羣臣就位定漏盡

侍中奏外辦皇帝出鍾鼓作百官皆拜伏太常導皇帝

升御坐大鴻臚跪奏請朝賀藩王奉白璧太尉中二千

石等奉璧皮帛羔雁雉再拜賀禮訖以贄授贄郎太樂

命奏雅樂乘黃令出車晝漏上六刻蠻夷以次入再拜
謁者引王詣樽酌壽酒授侍中奉觴再拜四廂樂作乃
行百官酒奏登歌進飯奏食舉樂乃召諸郡計吏前受
敕戒於階下羣臣再拜出夜漏未盡七刻謂之晨賀晝
漏上三刻更出百官奉壽酒謂之晝會別置女樂三十
人於黃帳外奏房中之歌江左不復晨賀元會設白獸
樽於殿庭樽蓋上施白獸有能獻直言者發樽飲酒乃
杜舉之遺式

為白獸示忌憚也宋志云白虎

魏晉冬至日受方國及百

僚稱賀因小會其儀亞於獻歲之旦

宋志云晉有其注

樂志正

旦大會上壽歌荀勗作冬至初歲小會歌張華作成帝

咸康七年尚書蔡謨奏八年正會儀注惟作鼓吹鍾鼓

餘伎樂並不作

北齊樂辭百華照晚千門洞晨懷黃綰白鷓鴣成行

傅王渾武帝

常訪渾元會問郡國計吏方俗之宜云云 熊遠建興初

遠曰履端元日貢士雲集有識於是觀禮 咸寧起居

注十二月庚子詔正會日百僚賜醪酒

晉起居注穆帝升平二年正月

朔朝會賜醪酒

唐志晉元正宴會詩集四卷伏滔哀豹謝

靈運集 傅玄賦又曰於是先期戒事衆發允敷萬國
來享各以其職翼翼京邑魏魏紫極坐太極之正殿儼
嵯峨以崔嵬羣后德讓獻誓奉璋前三朝之夜中庭燎
晃以舒光華燈若乎火樹熾百枝之煌煌 王沉正會
賦曰華幄映乎飛雲兮朱幘張于前庭曜五旗於東序
兮表雄虹而為旌備六代之象舞兮釐簫韶於九庭

唐杜佑三朝上壽議漢故事上壽四會曲注言有鍾鼓
無歌詩魏初有琴筑又易古詩名曰羽觴行用為上壽

曲晉代歌詩傳玄述具存

晉太極殿大會

晉起居注武帝太康元年詔江表初平於東堂小會作
樂五月庚寅臨軒大會於太極殿成帝咸康六年依中
興故事朔望聽政東堂 犖虞決疑要注漢制會建始
殿晉大會太極殿小會東堂燕之與會威儀不同會則
隨五時朝服庭設金石縣虎賁著旄頭文衣鷓尾以列
陛燕則服常服設絲竹之樂唯宿衛者列仗

梁元會禮

隋志梁元會之禮未明庭燎設文物充庭太階東置白獸樽羣臣並集皇帝服袞冕升坐王公升殿奉贄帝與入徙御坐于西壁下皇帝服通天冠升坐王公上壽大官進御酒主書賦黃甘逮二品以上尚書驄騎引計吏

受詔侍中讀五條陳便宜者聽詣白獸樽

北齊正日班五條詔書於

羣國 陳亦依梁禮

唐太極殿受朝賀 上壽 壽尊

志皇帝元正冬至受羣臣朝賀會前一日尚舍設御幄於太極殿有司設羣官次於東西朝堂展縣置棹陳車輿設解劍席列黃麾仗於殿庭羣官就次侍中奏中嚴羣官出次侍中奏外辦皇帝袞冕冬至服通天冠絳紗袍御輿出自西房即御坐符寶即奉寶置前公王以下就位典儀曰再拜皆拜上公一人詣西階席脫舄解劍北面跪賀元正首祚景物惟新伏惟陛下與天同休

冬至

去天正長至伏惟
陸下如日之升

乃佩劍納舄復位制曰履新之慶與

公等同之

冬至云履長

在位再拜舞蹈三稱萬歲初羣臣

將朝中書侍郎陳諸州鎮表給事中陳祥瑞按戶部
陳諸州貢物禮部陳諸蕃貢物冬至不奏祥瑞無諸
方表其會則大樂令設登歌於殿上二舞人立於縣
南尚舍設羣官升殿者坐又設解劍席尚食設壽尊
於殿上東序之端西向設坫於尊南加爵一太官令
設升殿者酒尊於東西廂近北設在庭羣官酒尊各
於其座之南皆有坫幕俱障以帷羣官出次侍中奏

外辦皇帝通天絳紗即御坐羣官就位侍中跪奏請
延諸公王等升光祿卿請賜羣臣上壽上公詣酒尊所
北面尚食酌會要舊制元日大陳設皇太子獻壽
次上公獻壽次中書令奏諸州表黃門侍郎奏祥瑞
戶部尚書奏諸州貢表禮部尚書奏諸蕃貢表太
史奏雲物侍中奏禮畢然後中書令又與供奉官獻壽
殿上皆呼萬歲按舊儀闕供奉官獻壽禮開元二十五
年李林甫革其舊儀奏而行之冬至亦然永徽二年八

月二十九日詔來月一日太極殿受朝後每五日一御

太極殿視事朔望朝即永為常式開元八年九月敕正

冬朝會宴見蕃國王臨軒設樂虞陳車輅備黃麾仗其

朔日受朝儀注減半

志說九部樂則去樂虞無警彈太
樂令率九部伎於左右延明門外

羣臣初唱萬歲即引九部伎
聲作而入各就座以次作

其年十一月十三日敕冬

至宜取以次日受朝 六典禮部郎中凡元日大陳設

於太極殿今大明宮於含元殿在東都則於乾元殿皇帝

袞冕臨軒展樂陳歷代寶玉輿輅備黃麾仗皇太子獻壽

次上公獻壽冬至如元正之儀其異者皇帝服通天冠無

諸州表奏祥瑞貢獻會要貞元四年李泌請冬至朝

賀中書令讀諸方表元和十二年淮西平申蔡州始

輸貢物戶部以其久不至請元日陳於庭十三年正月元

殿受朝賀御丹鳳樓大赦天寶六載十二月丙寅仗下後百官於尚書省闕貢物

百官志殿

中侍御史元日冬至朝會則乘馬具服戴黑豸升殿

太宗有正月臨朝詩元日朝羣臣岑文本奏三元頌曰

詔司存命掌故考憲章修法度三朝之禮畢陳九賓之

儀成具庭燎晃以飈舉明燈煜以星布月正元日節應
勾芒浮非煙而泛佳氣闢閭闔而啟德陽虞賓光祚
位呼韓厠於周行百寮濟濟萬國皇皇腰金鳴玉執贄
奉璋五輅接軫九旗揚旆羽蓋葳蕤雲罕掩靄

唐舍元殿受朝賀 大饗

實錄開元七年正月辛卯朔御舍元殿受朝十年正月
癸卯朔十六年十一月乙巳南至

太史奏黃
雲扶日

十八年正

月癸酉二十一年正月庚子朔二十三年正月戊申朔

二十六年正月庚午朔二十八年正月戊子朔二十九

年正月癸未朔並受朝賀建中元年十一月戊寅舍元

殿受朝賀初令親王出閣就班

舊紀元和元年正月丁卯朔御舍元殿受朝賀

丹鳳樓大赦改元

會要永泰二年

即大曆元年

十一月三日詔以

十三日甲子冬至令有司祭南郊於舍元殿受朝賀建

中元年十一月辛酉朔御宣政殿朝集使及貢士見自

兵興典禮廢陸州郡不上計內外不會同者二十有五

年至是始復舊典州府計吏至者一百七十有三

丁丑南至

戊寅含元
受朝賀

二年正月朔庚申御含元殿四方貢獻列為庭

實復舊制也會昌三年四月中書門下奏元日御含元殿百官就列唯宰相兩省官扇開侍立御前不拜而退令請對班於香案前侯扇開再拜升殿從之 盧鈞傳

宣宗元日大饗含元殿

太中十一年

裴度傳由太原朝京

師及陛見謁者欲宣旨帝遽曰朕當延英待御舊儀閣中羣臣未退宰相不奏事稱賀則謁者荅帝以度勲德故待以殊禮

唐含元殿元日受朝賀以實錄攷之玄宗十八南至一

肅宗三南至二代宗十一南至八德宗十六南至一憲

宗八敬宗一文宗一

太和七年正月巳丑朔

李華含元殿賦時

殷仲冬日正南至上公奉筓羣后在位一人壽昌萬

國承賜獻歲元辰東風發春縣法象魏與人惟新威

儀之嚴山嶽振振皇帝御袞龍之法服佩蒼璧之純

精執鎮圭導朱紘降輦登階微聞玉聲甸侯采衛

要荒蠻貊輸其方賁罔不來格司儀叙進象胥重

譯肅肅委皮乾乾奠璧設以庭燎天烘地赫雷鼓殷殷
朱干玉戚金根玉輅大常少伯火烈門旂霜交陸戟太
史來告卿雲勃興灑豐澤荅休徵司寇緩刑冢卿降德
華戎竭歡喜氣闡塞揭金雞於太清慶并之聲不踰辰
而霑四域

唐崇明門賀皇太子

寶錄乾元三年正月癸亥朔御含元殿受朝中書令代
國公子儀攝太尉上壽稱賀朝退百僚於宣政殿起居

聖皇乙丑常服於崇明門通賀皇太子丙寅外命婦朝
皇后於光順門內殿廣德二年十一月甲寅長至含元
殿受朝賀畢百官詣崇明門進名謁皇太子

唐紫宸殿受朝賀

舊紀貞元九年正月庚辰朔上御紫宸殿受朝賀賦退

朝觀仗歸營詩

會要作元和誤

冊府元龜貞元九年正月庚

辰朔帝御含元殿受朝賀禮畢帝賦退朝觀軍仗歸營

詩示宰臣等

貞元六年五月丙寅朔御紫宸殿受朝初將冕服御宣政屬塗潦常服御紫宸長慶

元年四月甲午幽州納
土上御紫宸殿受朝賀

東宮正會儀

東宮舊事正會儀太子著遠游冠絳紗袍登輿至承華

門前設位拜二傅二傅交拜禮畢不復登車太傅訓道

少傅在後太子入崇賢門樂作太子登殿西向坐皇太子大

小會庭設三
廂樂舞六佾通典皇太子元正冬至受羣臣宮臣賀

并會開元
禮

建隆崇元殿受朝賀 廣德殿上壽 乾德乾

元殿受朝

大明殿上壽冬至

開寶乾元殿受

朝

建隆二年

辛酉歲

正月丙申朔御崇元殿受朝賀服衮冕

設宮縣仗衛如儀仗退羣臣詣皇太后宮門奉賀上常

服御廣德殿羣臣上壽用教坊樂 會要元日五月朔

冬至大朝會其日將士填街列黃麾仗于庭百宮俱入

就位侍中版奏嚴辦鳴鞭宮縣撞黃鍾之鍾右五鍾皆

應皇帝衮冕御輿以出即御坐在位官拜舞太尉奏稱

賀中書令門下侍郎奏諸方鎮表及祥瑞戶禮部奏諸
州諸蕃貢物司天監奏雲物祥瑞禮畢撞鞀賓之鍾左
五鍾皆應伏列如舊以俟上壽百僚朝服立皇帝服通
天絳紗御輿以出百僚拜舞太尉執爵跪進稱千萬歲
壽三爵而起侍中奏鮮嚴所司承旨放仗百僚再拜退
其登歌則甘露嘉禾瑞木成文之曲宮縣則奏正安乾
安之樂舞則盛德升聞天下大定酒行三周皇帝御輿
入

建隆元年實儼撰四
曲隆安正安禧安

乾德四年

丙寅歲

正月朔御文

明殿受賀退詣崇德殿上壽十一月癸巳冬至御乾元

殿受朝常服御大明殿 臣上壽始用雅樂登歌二舞

賜羣臣酒

是年正至朝會撰二十四曲
白蘊甘露紫芝嘉禾玉兔

五年正月

庚寅朔御乾元殿受朝 太祖克澤潞下維揚復

湖湘得荆渚收劔南取嶺表平江左武功震耀開

寶九年

丙子歲

正月戊寅朔受朝乾元殿降王在列

聲明大備知制誥扈蒙上聖功頌述其事詔褒之

元會凡二十九太祖五

建隆二年乾德四年
五年六年開寶九年太

宗六

興國五年六年八年雍熙三年淳化元年二年

真宗四

咸平五年景德元年四年祥符六年

仁宗七

天聖五年慶厯元年三年七年

神宗二

熙寧

五年元豐六年

哲宗二

元祐五年紹聖三年

徽宗三

大觀二年政和八年宣和

六年冬會太祖五

乾德二年四年五年

太宗三

興國

二年端拱四年

真宗二

太平三年景德祥符八年

仁宗二

天聖

七年明道十年

神宗一

熙寧十年

徽宗一

政和二年

五月朔受

朝

建隆二年

太平興國乾元殿受朝賀

五年正月丙子朔上御乾元殿受朝賀退御大明殿
羣臣上壽 六年正月庚子朔 八年正月戊午朔

雍熙三年正月庚午朔 興國二年十一月庚寅

日南至御乾元殿受朝賀退御大明殿羣臣上壽

淳化

四年十一月
甲寅朔

淳化朝元殿受朝賀 上壽儀 雅樂

淳化元年正月戊寅朔上御朝元殿受朝賀下詔改元
三年正月丙申朔服袞冕御朝元殿受朝賀禮畢改通

天絳紗受羣臣上壽

四年十一月甲寅朔日南至御朝元殿受朝

初大明

殿常服上壽奏教坊樂至是始命有司約開元禮定上

壽儀以法服行禮用雅樂宮縣登歌萬舞酒三行而罷

復舊制也

罷大明殿上壽之禮

取嗣位以來祥瑞作祥麟丹鳳白

邇河清瑞麥五曲用之上壽用和安之曲

諸臣撰二十三曲

天

聖四年十二月丁亥上謂輔臣曰元會儀久廢來歲元

日行之宰臣王曾命有司撰集儀注明年正旦帝先率

百官上皇太后壽于會慶殿然後御天安殿

見上壽類

景德朝元殿受朝改元 元日會朝詩

景德元年春正月丙戌朔御朝元殿受朝改元大赦三年撰祥麟丹鳳河清等十三曲四年正月己亥朔御朝元殿受朝賀羣臣上壽諸道進奉契丹諸蕃使在焉下詔肆青司天言日抱戴佳氣覆宮闕上作元日會朝七言詩賜近臣屬和 祥符元年撰醴泉祥芝等五曲

元豐大慶殿受朝 儀注

元豐元年十一月十九日己丑詔龍圖直學士宋敏求

等四人詳定正旦御殿儀注 二年四月癸亥詔元會上壽不執鎮圭服通天絳紗張旗幟以昭文物闢大慶殿門引親王使相宰臣分東西入正安之樂作至位樂止從敏求言也 六年正月丁丑朔御大慶殿受朝始用新樂先是上以朝會儀物敝當改為詔閣門御史臺詳定朝會議更造仗衛輿輅冠服至是始陳於殿

周邦彥汴都賦天運載周甲子新歷受朝萬方大慶新闕于時再鼓聲絕按稍收鎬儼三衛與五仗森戈矛與

及戟探平明而傳點趣校尉而唱籍撞黃鍾以啟樂合
羽扇以如翼聆乾安之妙音仰天顏而可挹宣表章以
上聞奏靈物之充斥羣臣乃進萬年之觴上南山之壽太
尉升殿尚食酌酒樂有嘉禾靈芝和安慶雲舞有天下大
定盛德升聞飲食衍衍燔炙芬芬威儀孔攝笑語有文
紹聖賀元會表東臺瑞物冠玉璽之珍符左右輿圖增
金城之列障

紹興大慶殿朝會

紹興十二年十月十六日詔來歲行大朝會設黃麾大
仗車輅逍遙平輦法物樂舞旣而不果十一月禮部請
先舉文德殿視朝十四年八月二十四日閣門請御大
慶殿大朝會十月三日兵部言黃麾大仗五千二十七
人請減三分之一十二月二十三日御史臺太常寺修
大朝會儀注十五年正月丁未朔御大慶殿受朝百官
朝賀用黃麾仗三千三百五十人時無大慶殿學士
權於崇政殿行之免駐輦設簾不設地衣

院撰十二曲有瑞木成文滄海澄清瑞粟呈祥之曲

自是

一行而止是歲冬至亦止文德殿稱賀上壽亦用和安之曲

淳熙大慶殿稱賀

乾道九年九月上諭大臣曰正至既免大朝會百官更不稱賀似於典禮未至翌日詔禮官討論冬至正旦稱賀儀注以閏十二月十七日禮官言正旦皇帝服鞞袍御大慶殿皇太子文武百僚常服稱賀用黃麾半仗從之淳熙元年正旦始行稱賀之禮是歲冬至朝賀用黃麾角仗一千五十六人

慶元壽康宮朝賀

二年十月二十六日禮部大常寺言正至皇帝率百僚詣壽康宮行朝賀禮設黃麾角仗從之四年八月丙戌詔將率羣臣詣宮上壽既而不克行 紹聖元會頌臣伏覩唐虞盛隆五服迭朝更夏商周斯制加密禹會塗山玉帛萬國至于商湯爰有景亳豐宮岐陽成康是因三朝受圖漢人賦之區區朝儀未造有唐亦或不疑况膺正統席歸運未有若我宋之盛而陛

下之躋閣休緡隆典也邪若乃出千品具萬方計億事
材兆物此而不綴非翰墨者罪歟小臣被學最舊於頌
為宜為頌曰皇帝嗣位十有二載天庥地涵與物開泰
曰臣曰妾固有內外童甫短後秀顛髻睟陶粹飲和萬
室一態朝躋峻良獄洗鉗欽緇文黃輝稷籩嬉瀨皇帝
曰嘻當飭蠹壞奉先紀元庶靡恫悔有司跽言月征日邁
往雖郊見繼又禰配協休登平民物和會惟是班朝亦
禮之大懿典撤網不可弗再請以孟陬百執前戒帝曰

俞哉往踐毋懈于時三朝錯事宸宥初陽載暎晨陰剝
解梢矍扶魑飛厲肅曠旄頭陞楫韎韜金介萬官翔洋
至止藹藹鵷分鷺綴屏息收噫冠纒聯聯璀璨鞞珮五
輅中陳駟虬沛艾芝蓋葩華煜爚綵綵如星拱極如水
委海如天斯臨如日斯挂衆樂備舉縹以清籟乾安正
安迭用並採虞業騰桴祝哀敵殺么麼刊落兜離傑侏奄
臻八紘效琛走貝地官宗伯履貢斯在四夷君長立
列叢叢濮鈞島更遼差羌葦藿心晞陽左言推髻古人

象胥委體司話尉司稽首赫我昭代農敏于疇吏康于
緯卧鼓鞞弓不怵邊蠆萬宇更始擁相駢賚天子萬年
福祿攸屆尉臣稽首禮則不怵玉色粹溫旁諏下建孰
為蠹螟孰致劬勸財力孰羸仕課孰最孰為國急孰斯
民害孰俊未蒐孰冗未汰孰懲孰革孰勞孰俸百辟愉
愉並受誥誡天子萬年衍衍樂豈尉臣稽首竣事而退
於皇緝熙哀時之對零我渥恩鴻濛汪濊聖敬日躋取
乾用大天子萬年萬世永賴 山峙鶴立人聲寂然待

山峙竊立人聲寂然侍中奏而中外肅也日角龍犀天
光下照黼坐升而臣隣伏也劔佩相磨百辟俱進則如
衆星之拱北辰蠻琛夷寶四遠咸集則如百川之赴巨海


樽陳白獸宴設華燈 萬官翔洋鵠盼鷺綴 駕鷹

輅以充明庭撞黃鐘而御太極踰沙軼幕辨髮卉裳咸
奉玉帛而介九賓襲衣冠而獻萬壽 臚湊羣辟 雙

闕峨峨上覆慶雲 峨冠垂紳魚雅就列 庭燎析光

雞人呼旦納言入奏中嚴外辨 黃麾龍旗歲粦婀娜

星弁金介于右于左



玉海卷七十一

欽定四庫全書

子部
玉海卷七十三

詳校官給事中_臣 查善長

主事_臣 祁韻士覆勘

總校官進士_臣 朱 鈐

校對官編修_臣 沈清藻

謄錄監生_臣 熊 焯

欽定四庫全書

玉海卷七十二

宋王應麟撰

禮儀

冊禮

說文冊符命也象其札一長一短中有二編之形

周策命

見前

周語襄王使大宰文公及內史興賜晉文公上卿逆

于境晉侯郊勞館諸宗廟饋九牢設庭燎及期命于武宮晉侯端委以入大宰以王命命冕服內史贊之三命而後即冕服既畢賓饗贈餞如公命侯伯之禮加以宴

好 洛誥王命周公後作冊逸誥

畢命序康王命作冊畢

漢拜皇太子儀 章德殿策皇后儀

續志拜皇太子儀百官會位定謁者引皇太子當御坐殿下北面司空當太子西北東面立讀策書畢中常侍持太子璽綬太子再拜三稽首謁者贊曰皇太子臣某

謁者稱制曰可三公升階上殿賀壽萬歲因大赦天下
禮畢注蔡質所記立宋皇后儀太傅太尉司徒司空太
常條列禮儀皇后初即位章德殿太尉使持節奉璽綬
天子臨軒百官陪位皇后北面太尉立階下東向宗正
大長秋西向宗正讀策太尉授璽綬中常侍長樂太僕
受璽奏於殿前女史授婕妤婕妤授昭儀昭儀以帶皇
后皇后拜訖黃門鼓吹三通鳴鼓畢羣臣以次出后即
位大赦天下皇后秩比國王即位威儀赤紱玉璽前

傳杜欽云宜因始初之隆建九女之制太后以為故事
無有 通典魏制天子冊后以皮馬庭實加穀珪晉成
帝咸康二年臨軒拜皇后帝御太極殿羣臣畢
賀

漢皇太子納妃 唐冊妃

通典漢制皇太子納妃奉常迎

時叔孫通定禮以天子無親迎之義皇太子以

奉常迎 晉太康中有司奏太子納徵用玄纁束帛加璧羊

馬二駟東晉用玉璧一獸皮二宋元嘉十五年四月納

妃百官上禮壬戌於太極殿西堂叙宴太始五年納徵
加珪璋各一約熊羆皮各二北齊妃朝皇帝於昭陽殿
朝皇后於宣光殿隋禮命有司以特牲告廟冊妃鷄鳴
夙興以朝奠笄於帝后 唐禮志皇太子納妃其冊妃
前一日主人設使者次云云使副朝服乘輅持節鼓吹備
而不作至妃氏大門外次掌巖奉綸翟衣及首飾內廐
尉進厭翟於大門之外諸衛帥其屬布儀仗云云奉冊寶
按者進授使副冊寶內侍西面受之東面授典內典內

持入跪置於閣外之按傅姆贊妃出立於庭中北面掌
書跪取玉寶南向司則前贊妃再拜北面授冊寶於掌
書南向授妃妃以授司閏司則又贊再拜臨軒醮戒前
一日有司設御坐於太極殿阼階上西向皇太子進當
御坐前東而立皇帝命之 晉起居注元帝太興元年
上臨軒使冊命皇太子妃 初學記唐太宗冊太子妃
文云作合春宮寔協三善

晉冊拜太子

晉帝紀元帝太興元年三月庚午立王太子紹為皇太子冊文曰於戲朕承天序忝繼祖宗之洪基君臨于萬邦戰戰兢兢若涉淵水未有攸濟自古聖王敷宅四海莫不建立元子本枝百世今稽古授爾于儲宮以陪貳于朕躬欽哉爾其克念乃祖日新厥德何遠非佞何親非賢欽翼師傅以丕崇大化可不慎歟爾其敬之 孝

武太元十二年庚弘之議按武帝咸寧中諸王新拜有司奏聽近臣諸王公主上禮今皇太子國之儲副既已崇建

普天同慶謂應上禮奉賀 徐廣東宮頌禮樂承軒典
冊授庭命服惟九龍旂鸞旌

優策

南史褚淵傳為錄尚書事有司疑立優策尚書令王
儉議中朝以來三公王侯則優策並設官品第二策而
不優優者褒美策者兼明委寄尚書職居天官政化之
本故尚書令品雖第三拜必有策錄尚書事與本官同
拜故不別有策即事緣情不宜均之凡庶宜有策書用

申隆寄既異王侯不假優文從之 晉石鑿傳三公冊
拜皆設小會所以崇宰輔之制

唐臨軒冊皇后

志皇帝納皇后命太尉為使宗正卿為副前一日有司
展懸設按陳車輿於太極殿廷如元日皇帝袞冕出自
西房即御坐侍中宣制曰納某氏女為皇后命公等持
節行納采等禮云云 武德九年八月二十一日立長孫后 冊后前一日守宮
設使者次於后氏大門外之西尚舍設尚宮以下次於

后氏閤外其日臨軒命使如納采奉禮設使者位於大門外之西東向使副及內侍位於使者之南舉冊按及寶綬者在南持節者在使者之北使副乘輅持節備儀仗鼓吹備而不作內僕進重翟以下於大門之外諸衛令其屬布后儀仗使者曰某奉制授皇后備物典冊主人出迎於大門外使者入門而左持節者前導奉冊寶按者進授使副內使受之內謁者監持入跪置於按尚宮曰有制后再拜宣冊又再拜尚宮授后以冊受以授

司言尚服又授以寶綬受以授司寶禮畢 宋朝李清
臣作皇后冊文曰賜爾皇后之寶方寸有半文盃螭紐
授之玉冊厥簡五十命爾翟衣笄纚博鬢黼領大帶以
朝暨歲時將祀于東西宮金輿朱蓋武賁呵衛步障行
道是惟顯哉

唐臨軒冊三公

會要貞觀八年敕拜三師三公尚書令雍州牧開府儀
同三司驃騎大將軍左右僕射並臨軒冊授太子三少

侍中中書令六尚書諸衛大將軍特進鎮國大將軍光祿大夫太子詹事九卿都督及上州刺史在京者朝堂受冊光宅二年並停大曆十四年五月臨軒冊尚父子儀於宣政殿自神龍以來冊禮久廢唯天寶末冊楊國忠為司空至是復行貞元三年四月李晟拜太尉中書令帝坐宣政殿引見備冊禮受冊訖備羽儀乘輅謁太廟視事尚書省

賜良馬錦
綵十計

故事臨軒冊拜三公中書令

讀冊侍中奏禮畢宰相攝之時宰相張延賞欲輕其禮

令兵部尚書攝中書令左散騎常侍攝侍中臨軒冊命
宰臣不親行事自此始 舊紀長慶二年三月景辰守

司徒裴度正衙受冊

太和四年裴度進
司徒表辭冊禮

晉成帝臨軒

遣使拜太傅太尉司空會將作樂宿懸於殿庭門下奏
非祭祀燕饗則無設樂之制事下太常蔡謨議臨軒遣
使宜有金石之樂遂從之臨軒作樂自此始 宋朝親
王大臣例辭冊禮

唐冊皇太子

實錄貞觀十七年四月冊文云永言少陽也宅是寄疇
浴朝列卿士叶從 永徽七年正月辛未冊文云盡謙
恭於齒胄審方俗於迎郊春禮冬詩趨庭靡懈三善六
德勉志無愆 唐隆元年七月己巳冊文云爾有文武
仁孝之德以知君臣父子之道 開元三年正月丁亥
冊文云正位少陽欽惟大典二十六年七月己巳冊文
云仰稽天道俯察人心立長則順天所助也議才則賢
人之望也 乾元元年十月甲辰冊文云禮經著元良

之德易象載重明之義 貞元二十一年四月乙巳冊
文云付爾以承祧之重勵爾以主鬯之勤以正萬國之
心以揚三善之德 元和七年十月壬寅冊文云教深
蘊瑟氣叶吹銅溫文得於天縱孝友因於自然 通典
開元禮有臨軒冊命內冊皇太子儀

唐冊命諸王

通典臨軒冊命諸王大臣設御幄於太極殿北壁羣官
次於朝堂太樂令展宮懸於殿庭諸衛列仗受冊者服

朝服從第備鹵簿集朝堂次皇帝即御座受冊者東北
西面中書侍郎引冊按中書令稱有制受冊者再拜中
書令讀訖受冊者進受持按者以按退冊三師三公親
王皇帝服袞冕之服鼓吹令設十二按乘黃令陳車輅
尚輦陳輿輦諸衛設黃麾半仗受冊者初入門舒和之

樂作

開元禮

後漢制拜諸王侯三公之儀百官會位定謁

者引光祿勳前謁者引當拜者前當座伏殿下光祿勳
前一拜舉手曰制詔其以某為某讀策書畢再拜晉咸

寧三年議國卿君之貳也命使之日御親臨軒百寮陪位北齊策諸王臨軒尚書讀策授王冊軸一枚長二尺以白練衣之用竹簡十二枚六枚與軸等六枚長尺二寸文出集書書皆篆字隋冊開國郊社令奉茅土立

於仗南西面每授冊訖授茅土焉

初學記載太宗冊漢王荆王文

祭統曰古者明君爵有德而祿有功必賜爵祿於太廟示不敢專也故祭之日一獻君降立阼階之南南鄉所命北面史由君右執策命之再拜稽首受書以歸而舍

奠于其廟疏若天子命羣臣則不因常祭之日特假於廟大宗伯云王命諸侯則儼注云王將出命假祖廟立依前南鄉 春秋疏天子賜諸侯之命書傳無正禮唯文元年天王使毛伯來錫公命僖十一年傳王賜晉惠公命周語王賜晉文公命皆是即位而賜之又賜之以圭擬朝而合瑞諸侯即位禮必朝王即賜之命春秋之時賜命禮廢唯文公即位而賜成公八年乃賜桓公追賜

唐含元殿奉冊

見殿類

唐宣政殿冊太子 太極殿臨軒冊皇太子

開元受冊儀注

會要長慶二年十二月

丙午

御紫宸殿冊皇太子

癸巳立景王湛

為皇太子故事冊太子御宣政殿是日備宮懸於殿庭列內

仗於兩閣門內羣臣辨色序立於宣政門外就外廊食訖具衣冠劔履入自月華門列位正衙辰後一刻入閣

上臨軒太子步自崇明門以宮寮翼從駙馬二人扶衣

冠禮儀使導以進及樂作扇開羣臣拜訖太子進至龍

墀東南再拜受冊攝中書令

杜元頴

讀冊以授太子太子

再拜蹈舞歸崇明門幕殿羣臣賀皇帝訖退詣崇明門

謁太子太子命舉簾執笏荅拜

宮寮拜則受之

通鑑開元二

十六年七月己巳上御宣政殿冊皇太子

會百官

故事乘

輅至殿門至是步入

是日大赦天下賜酺三日

元和四年冬十月御

宣政殿冊太子

先是三年李絳上言

紀四年閏三月丁卯立鄧王寧七年七月乙丑立遂王

宥為太子十月壬寅宣政殿冊太子

實錄順宗貞元二十一年四月乙

巳

一云巳丑

御宣政殿冊太子有慶雲見

紀三月癸巳立廣陵郡王為皇太子

四月戊申以冊皇太子文武官子為父後者勲兩轉

肅宗乾元元年十月甲辰

帝御宣政殿冊成王為皇太子大赦天下

五月庚寅立太子七月壬

午太子於宣政殿謝冊命

文宗太和七年八月庚寅御宣政殿冊太

子志嘉禮臨軒冊皇太子有司卜日告天地宗廟前

一日尚舍設御幄于太極殿有司設太子次于東朝堂

之北西向又設版位於大橫街之南展懸設按陳車輿

及文武羣官朝集蕃客之次位其日前二刻宮官服其器服諸衛率各勒所部陳于庭左庶子奏請中嚴侍衛之官奉迎僕進金路內率一人執刀贊善奏發引令侍臣上馬庶子承令其餘畧如皇帝出宮之禮皇太子遠游冠絳紗袍三師導三少從鳴鏡而行降路入次亦如鸞駕其日列黃麾大仗侍中奏請中嚴有司與羣官皆入就位三師三少導從皇太子立於殿門外之東西向黃門侍郎以冊寶綬按立於殿內道北西面中書侍郎

立按後侍中乃奏外辨皇帝服袞冕出自西房即御坐
皇太子入就位典儀曰再拜皇太子再拜又曰再拜在
位者皆再拜中書令降立於皇太子東北西向中書侍
郎一人引冊一人引寶綬按立於東西面以冊授之中
書令曰有制皇太子再拜中書令跪讀冊皇太子再拜
受冊左庶子受之侍郎以璽綬授中書令皇太子進受
以授左庶子皇太子再拜在位皆再拜侍中奏禮畢皇
帝入自東房 通典開元二十六年六月庚子肅宗為

太子將受冊

紀云立忠王與為皇太子

太常所撰儀注有服絳紗袍

之文上手敕改為朱明服

紀有司行冊禮其儀有中嚴外辨其服絳紗太子曰此天

子禮也下公卿議太師蕭嵩左相裴耀卿請改外辨為外備絳紗衣為朱明服從之

唐光順門冊禮

會要代宗女嘉豐普寧公主同降有司具冊禮光順門

貞元元年嘉誠出降德宗幸望春亭臨餞厭翟敝不可

乘以金根代之

乘金根車自主始

四年二月七日太常卿董晉

奏八日正衙冊新都長公主開元禮皇帝御正衙命使

行冊禮陳樂懸貞元元年五月冊嘉誠二年三月冊長
林帝不御正殿不設樂遂為故事新都以十日下降宜
前一日於光順門行五禮敕其日於光順門即行冊禮

傳新都貞元十二年下嫁
具禮光順門五禮由是廢

十五年七月二日有司奏冊

公主儀注開元之儀侍中宣制中書令受冊以冊授冊
使冊案自東上閣門出詣橫街北宣付中書門下制可
二十一年四月七日禮儀使奏舊制正衙命使使出含
元殿西廊側門外登輅車從光範門入詣光順門進冊

今請冊使出宣政門自興禮門出赴延英光順門進冊

通典開元禮冊公主設御幄於太極殿展宮懸鈸戟近
仗入陳於殿庭冊使等初入門舒和之樂作設使者及
冊案便次於光範門及長樂門外公主花釵翟衣司言
引就受冊位尚儀執冊跪讀公主受冊以授司言 後

漢魏譚永平中為主家令

公主家令

平陽參佐命襄城循

矩法臨川屬文

上孝德頌

漢陽戒侈廣德治家有禮法岐陽

事舅姑以禮聞

岐陽下嫁杜棕帝為御正殿臨遣繇

西朝堂出復御延喜門止主車大賜賓從金錢開第昌
化里疏龍首池為沼后家上尚父大通里亭為主別館
會要元和九年八月云云神策兵三百於光範門翼
道京兆尹裴武為禮會使

乾德崇元殿受冊

見殿類

乾德元年

癸亥

十一月甲子合祭天地于南郊還御明德

門大赦改元羣臣奉冊上尊號於崇元殿丙寅唐主遣

使助祭及賀冊號

開寶元年

戊辰

十一月癸卯郊祀御

乾元殿受尊號冊 國朝之制百官三表或五表請上尊號命大臣撰冊文及書冊寶其冊中書省造用珉玉簡其寶門下省造用玉受冊多用祀禮畢日御正殿行禮 唐開元年十一月戊子羣臣上尊號曰開元神武皇帝二十七年二月己巳上尊號曰開元聖文神武

至道朝元殿皇太子冊禮

至道元年乙未八月壬辰十八日以開封尹壽王為皇太子

自唐天祐以來斯禮久廢上始舉行中外胥悅丁酉以
學士承旨宋白為冊皇太子禮儀使有司既定冊禮又
請如唐開元制宮臣止稱臣不行舞蹈之禮又言百官
見太子自兩省五品尚書省御史臺四品諸司三品以
上皆荅拜餘悉受拜宮臣自左右庶子以下悉用參見
之儀其皇太子宴會位在王公上奏可有司又草具皇
太子受冊畢見皇后儀詔止用宮中常禮九月丁卯
四上御朝元殿即崇元殿也後改冊皇太子陳列如元

曰天安又改大慶

會之儀

設黃麾大仗及宮縣樂于庭

皇太子常服乘馬赴朝元門外

幄次改服遠游冠朱明衣三師三少導從入殿受冊寶

太尉率百官奉賀太子易服乘馬還宮百官常服詣宮

參賀自樞密使內職諸王宗室師保賓客宮臣等畢集

太子常服就坐諸王宗室等以次參賀皆荅拜訖受文

武官宮臣三品以下參賀庚午具鹵簿謁太廟五室常

服乘馬出東華門升輅十月乙亥太子遜宮寮稱臣許

之 會要八月二十三日門下省言按開元禮冊皇太

子寶以黃金為之方一寸又隋志皇太子寶龜紐文曰
皇太子寶朱組大綬請如舊制製造從之九月二十二
日丑有司言太子受冊奏正安之曲詔宋白撰樂章二
曲

天禧天安殿冊皇太子

天禧二年

戊午歲

八月丁酉至辛丑羣臣三表請立太子

甲辰詔立昇王為皇太子乙巳以學士晁迥為禮儀使
丁巳禮官請臨軒冊命日奏明安之曲從之九月丁卯

上御天安殿冊太子禮畢百官稱賀畢上有五色雲紫
雲如華蓋癸酉皇太子朝謁太廟日左右有赤黃珥黃
雲捧日其儀帝服袞冕御天安殿禮儀使引太子就版
位再拜中書令升殿承旨降階北面讀冊中書令奉冊
授皇太子太子以授右庶子又奉寶綬太子受訖以授
左庶子太子出入皆作明安之樂

是迫拱明
安三曲

百官詣宮

參賀再拜太子答拜丙申賓客李迪上賀建儲闈禮成

詩詔褒之

冊北寶南用三師為
前導三少為後從

政和五年二月十四

日大慶殿行冊禮 治平三年十二月壬寅元豐

八年三月甲午朔紹興三十二年五月甲子建儲

皆不及受冊 辨壽街之牘本自生知守馳道之

規匪由師授 再至問安重明麗正 竒智夙彰

英聲外發 勤至寢門樂游講肆資弦誦以崇術

儀星海而昭象 金昭玉裕 協華復旦日宣重

光

天聖崇政殿受冊儀注 紹興慈寧殿受冊

建隆元年二月乙未上太后杜氏尊號不果行冊禮 天

聖二年七月十八日甲辰宰臣欽若請上皇太后尊號

許之八月八日學士承旨李維等上皇太后於崇政殿

受冊儀注帝曰內殿受冊豈推奉母儀之意詔甲午於

文德殿上尊號天安殿發冊十一月十三日丁酉郊祀

禮成帝御天安殿受冊畢再序班發太后冊寶乘輿赴

文德殿太后服儀天冠袞衣以出奏隆安之樂奉冊寶

置御坐前冊曰周有思齊之什播于聲歌漢有長樂之注垂於竹帛皇帝行稱賀之

禮百寮畢賀己亥詔曰發寶冊於大庭奉鴻名於慈極
明道二年二月乙巳以饗七室禮成復行冊禮 治平

二年十一月壬申文德殿發冊寶熙寧二年四月元祐
二年九月丙辰崇寧二年五月皆行冊太后之禮 紹

興十年十一月十二日禮官定奉冊儀注十二月壬午

於常御殿發冊授攝太傅於慈寧殿奉上進賀如宮中

儀羣臣遙賀上親書冊文

奏聖安等八曲
冊藏慈寧宮

紹定四年

元日奉冊寶上太后尊號曰壽明慈睿

景祐皇后冊禮

舊制后妃皆寫告進入景祐元年九月甲辰立皇后曹

氏二十九日命禮院詳定冊皇后儀制

乙巳命宰臣李迪為冊禮使參

政王隨副之

禮院言皇后玉冊如太子制度用珉簡五十寶

用金方一寸五分高一寸文曰皇后之寶盤螭紐服以

禕衣六帶玉佩雙綬十一月三日己丑

是日冬至

行冊禮于

文德殿治平二年十一月壬申祀圓丘大赦還御文德

殿發寶冊上皇太后及冊皇后元祐七年五月十五日

日納成納吉告期三使受制書十六日文德殿發冊政
和元年正月詔皇后受冊陳黃麾仗重翟車小駕鹵簿
紹興十三年閏四月己丑立貴妃為皇后詔左相押麻
十三日太常定受冊儀注列黃麾仗于文德殿皇帝服
通天絳紗臨軒發冊奏乾安之樂皇后禕衣受冊於穆
清殿奏坤安之樂乾安正安坤安等十三曲甲辰十七日行冊禮于文
德殿設黃麾半仗千四百九十九用宮架樂百官稱賀
次詣內東門賀淳熙三年九月己巳上儀注同 隆興

元年十一月立皇后不設大輦用黃麾半仗陳逍遙平
輦紫方織十團扇十二朝謁德壽宮乘龍飾肩輿貴
妃冊命始於慶曆八年十二月丁卯冊用竹簡印用金
紹定三年十二月十日上御文德殿冊命皇后

熙寧文德殿奉玉冊

熙寧二年四月二十六日文德殿奉太皇太后玉冊
元祐三年三月五日太皇太后手詔受冊止就崇政殿
九月乙卯發冊寶于大慶殿太皇太后御崇政殿受冊

丙辰冊皇太后太妃 嘉祐二年七月丁酉文德殿冊
命充國公主

紹興德壽宮冊禮 慶元上三宮冊寶

紹興三十二年孝宗即位

六月甲午
上尊號

八月甲戌有司上

光堯壽聖太上皇帝壽聖太上皇后尊號儀注皇帝服
通天絳紗禮部侍郎奏中嚴外辨禮儀使請行發冊寶
之禮皇帝執大圭舉冊寶授太傅禮部郎中奏解嚴皇
帝自祥曦殿朝服履袍乘輦而出至德壽宮大次鼓吹

儀衛分列於宮門舉冊寶官跪舉冊寶興皇帝服通天絳紗出大次執大圭禮儀使請恭行奉上尊號冊寶之禮皇帝執大圭北向再拜進冊寶於御坐稽首稱賀禮畢皇帝入宮奉上太上皇后冊寶戊寅行奉上冊寶禮

先是六月丁亥集議尊號於都堂

乾道六年十一月二十一日上帥百官

請加尊號七年正月丙子朔大慶殿發冊寶禮畢詣德壽宮上冊寶次上太上皇后冊寶淳熙二年十一月戊申十二年十二月庚戌朔加上尊號 慶元二年十

月三日皇帝率百僚詣慈福壽慈壽康宮上册寶

稱賀 唐永貞二年正月丙寅一作戌朔太上皇於

興慶宮受朝賀皇帝率百僚奉上尊號冊文曰云

云請因壽歷以播鴻名謹上尊號曰應乾聖壽

億載萬年為眾父父 乘翠鳳之車鏤白玉之牒

明皇至道順宗應乾 設黃麾於大庭鏤白玉之新牒

臨彤庭發玉版 翠華之旗靈鼉之鼓陳於廣宇相

我盛舉 蚺蟻青龍婉僊象與其載伊何煌煌金書

維昔曠典我龍舉之 大哉堯乎南嚮垂裳君哉舜也
拜而受觴

乾道大慶殿冊皇太子

乾道元年八月十日丙戌立鄧王為皇太子禮官言皇
帝御大慶殿冊太子服通天冠絳紗袍百官朝服立班
太子受冊服遠游冠朱明衣執植圭謁太廟服袞冕乘
金輅百官詣太子宫賀並荅拜依會要冊用珉玉簡六十
枚前後四枚刻龍填金貫以金絲藉以錦褥盛以漆匣

裝以金華飾以螭首今請用珉簡七十五枚

即天禧金之制

寶按禮義羅寶以黃金為之係龜紐方一寸係以朱組

大綬連玉環金簡

三朝志寶方二寸厚五寸

壬寅兵部官黃麾半仗

用一千四百九十九人甲辰太子奏辭金輅十月十六

日御大慶殿冊太子列黃麾半仗撞黃鍾作乾安明安

之樂禮成稱賀撞蕤賓之鍾十八日御紫宸殿太子稱

謝遂朝謁景靈宮太廟又詣德壽宮謝七年二月八日

癸丑恭王升儲三月二十三日行冊禮于大慶 嘉定

二年八月十三日御大慶殿冊皇太子

寶慶慈明殿上冊寶

寶慶三年正月一日上壽明皇太后冊寶紹定元
年正月一日上壽明慈睿四年正月一日上壽明
仁福慈睿皇太后冊寶 太后 塗山之德渭溪
之祥圖徽寶冊玉色金相 龍袞翼翼玉書煌
煌維冊伊何鏤玉垂鴻維寶伊何範金鈕龍翊以
執御間以笙鏞 金支秀華垂紳佩玦或導或陪

率履不越 煌煌鳳字玉氣宛延天門崖岫飛驂後
先龍箕四合奏鼓赫赫母儀天下何千萬年 鸞回
寶勢虹貫瑤光寶章煌煌導以笙磬 后 重翟出房禕
衣被躬委委佗佗河潤山容 祥發倪天符彰夢日
明章婦順表正人倫 超任邈似比德皇英 椒塗蘭
馭 月華儷日坤美承乾 天作之合家邦其興朱芾
斯皇子孫繩繩 景命有僕保右自天永錫祚嗣何千
萬年 有璽范金有冊鏤瓊 懿範柔容如月斯輝

翬衣加追玉之笄螭紐賁範金之寶 篆金籀玉之文

植羽崇牙之設 金螭玉檢 班政蘭閨宣禮椒屋

人覆玉衣燕銜石字 慶洽瑤衣 易基乾坤詩首闕

睢書美釐降 赫赫惟皇如日之光肅肅惟后如月之

常禮行一時明照無疆 臣工在廷劔珮瑒瑒來汝疑

丞明命是將 刻簡以珉鑄寶以金持節伊誰時維四

鄰自我文德達之穆清 禮備樂成合扇鳴鞭

備物典策樂之鼓鍾拜而受之極其肅雍司言司

寶各以職從行地有慶與天無窮 羽衛外列揚

顏中映 六宮承式二南流詠 內治允修陰教

肅兮宜君宜王綏百福兮 嗣徽媯汭思媚周姜

母儀萬寓訓藹紫房 稟祥月輝 膺華丹耀登

瑞紫穹 蘭殿椒塗 儷德坤柔倪華天極 倪

天炳月嬪光紫霄 神祚玉衣天開金屋 皇太

子 琯琤瑳瑳篆金煌煌對揚于庭是承是將山

重其暉日重其光觀瞻以懌國有元良 淵冲象德玉

裕凝姿進退周旋有肅其儀 翠華之旗靈鼉之鼓陳

於廣宇相我盛舉 珉玉玠幽裊蹠精良既刻厥文亦

鑄之章 鸞旌列叙雜戟分行前星有爛瑞日重光

軼誦韜莊 道契黃離位隆蒼震 日光月輪山輝海

潤相見乎離盖取諸震 前星涵采洊雷揚聲 麗日

重光非煙五色 龍旗列仗鱗筭充庭 班輪飭駕碧

鏤題宮 幼海澄瀾前星騰耀 馳道美漢寢門稱周

瑜玉發響畫輪停輶 若發居豐猶莊在漢 樂正

歌風司成頌德 重明疊聖 重離炤景 濟濟卿士
將將鼓鐘 儲副豫定器之公兮冊授孔時禮之隆兮
體乾作貳命服斯九 前星比曜 波澄少海景麗
前星 副極儀天 金鉞玉度 稟粹重離摘英若木
入監出撫日就月將 爰以吉日冊于明庭鼓鐘載
和文物大備 業光啓誦 道亞霄極 天官揆日稷
嗣陳儀負宸當陽薦紳就位鳴球拊石具物有容 撰
吉展儀 兩離相續 副君昭象道應黃離銅樓備德

玉裕成規 啟誦懃德莊丕掩粹 洊雷揚祉重離闡耀

公主 螭綬龜章玉佩金軒 周美王姬之華下正

后之一等漢推帝女之寵主同姓之諸公 堯有娥英

舜有宵燭禴狄之衣辟邪之玉 西京故事主以上公

唐室近儀錫之美號 君袂備物公主主儀 曳紅綬

錫青圭 帝妹中行易象贊其元吉王姬下嫁召南美

其肅雍 魯郊築館沁水疏園 京房載湯嫁妹之辭

曰死以天子之尊而乘諸侯死以天子之富而驕諸侯

陰之從陽女之順夫本天地之義也往事爾夫必以禮
義 荀悅言尚主之制非古釐降二女陶唐之典歸妹
元吉帝乙之訓王姬歸齊宗周之禮 荀爽曰帝堯之
女下嫁於虞猶屈體降下勤修婦道帝乙歸妹言湯以
娶禮歸其妹於諸侯也春秋之義王姬嫁齊使魯主之
不以天子之尊加於諸侯也今漢承秦法設尚主之儀
違乾坤之道失陽唱之義宜改尚主之制以稱乾坤之
性 唐貞元元年冊云春秋書築館之儀易象著歸妹

之吉 下嫁諸侯諒惟古制肅雍之德見美詩人 易
著于歸詩稱下嫁 黼藻四德笙簧六行 漢頌魯國
魏錫常山

玉海卷七十二